

## MAK Gae Oraiwa Mak Tenewa

### *Babataito Abnawa Jon Eb Waribiyaiwi*

<sup>1</sup> God Usiwa Iesu Keriso gae oraiwa amatonewa.

<sup>2</sup> ✨ Propeta Aisaya buka meuma danave tene,  
“Yawa, ne umum abnawa barautna namugap ompe, me  
ebu geuma waribiyape.”

<sup>3</sup> ✨ “At inguiwa arawa danave apan da noiwa auwaivi,  
‘Ayapan oya ebu waribiya, ebu siwavit menan waribiya.’”

<sup>4</sup> ✨ Meve Jon uwane, at inguiwa arawa apa babataito  
amunivi, sira opata me nonemagowa biroriyag babataito  
atan oya, wag dirumivi. <sup>5</sup> At Judia ge Jerusarem igiyawa  
undag menan amiya. Mu kukaeba muma boruwa aya, sira  
mu yoi Jodan danave me gumbe babataito aya.

<sup>6</sup> ✨ Jon wape ennewa me mae kameru gumawa gaibu,  
kwit gumbe powawa topanne, sira me paki ge kemari  
mundanawewa naivi. <sup>7</sup> ✨ Mame me gaiyawa, “Sira apan ne  
amanap uwapewa me yusipama, ne me mina onan. Ne  
oma den ane kwanasik amawa sandoro vetna. <sup>8</sup> Ne yoi  
gumbe babataito ayenna, go me Guwawa Iyakaisiyapama  
gumbe babataito ayempe.”

### *Iesu Babataito Anewa Amaorot Uwa Wanne*

<sup>9</sup> Me kumiwa apa Iesu at Nasaret Gariri danave apa  
onne, sira me Jon gumbe yoi Jodan apa babataito ane.

<sup>10</sup> Sira Iesu yoi gumbe dauwanewa, kwimin watabne  
Guwawa me umuk mina aig onivi yaune. <sup>11</sup> ✨ Sira noiwa

---

✨ **1:2:** Mak 3:1    ✨ **1:3:** Ais 40:3    ✨ **1:4:** Apa 13:24; 19:4    ✨ **1:6:**  
 2Ki 1:8; Mat 11:8    ✨ **1:7:** Apa 13:25    ✨ **1:11:** Sam 2:7; Ais 42:1; Mat  
 12:18; Mak 9:7

kwimin apa uwane, “Ge ne utunwa ne baigan neuma gungap, ge gungap ne degadega eni.”

<sup>12</sup> ☆ Tatevit Guwawa me baraune at inguiwa arawa aine.

<sup>13</sup> ☆ At inguiwa arawa apa me kum 40 wakeg Seitan amaorot uwag wanne. Mundanawewa maeba me gaibu wakeya, sira aneya me gumbé uwag waniya.

### *Iesu Aigowawa Meuma Namuirenwa*

<sup>14</sup> ☆ Jon me nog barauya aignewa, meve Iesu Gariri aine God gae meuma oraiwa opata wane. <sup>15</sup> ☆ Me wane, “Kum me uwaivi, God toimuwawa me koni aivi. Ye nonemagewa biroriyaya sira gae oraiwa anotumat aya.”

<sup>16</sup> Sira Iesu poeman Gariri visive ainewa, me yawamne Saimon ge gwaneba Andru mu poeman danave uwariri aoreme. Kuyawa mu gwambui upeme igiyawa. <sup>17</sup> Iesu dirumne, “Amanap oneya. Wag toyau yentna, ye iyayapan upeme igiyawa aya.” <sup>18</sup> Tatevit uwariri muma yankweg me amave amiya.

<sup>19</sup> Sira me kusi atan aike Jebedi usiwa Jemus ge gwaneba Jon mu wa danave uwariri muma tamibarip eme yawamne. <sup>20</sup> Munan tatevit auwanewa, mu mamowa Jebedi ge nau meumawa igiyawa wa danave kwemiya. Mu me amave amiya.

### *Apan Me Airapu Kukaeba Gaibu*

<sup>21</sup> Mu at Kapenaum amiya. Sabat Kumiwa apa Iesu sinagogu unig aine, sira me amatok wak toyau munne.

<sup>22</sup> ☆ Iyayapan toyau munnewa anog teraya. Kuyawa apan da bira yusiwa aunewa mina toyau munne, me Gwangwan toewanewan igiyawa mina onan. <sup>23</sup> Sira sinagogu me danave apan da wakene. Me danave airapu kukaeba wakeya. Me kwaruwag wane. <sup>24</sup> ☆ “Nasaret apan Iesu, ge

---

☆ **1:13:** Sam 91:11-13   ☆ **1:14:** Mak 6:17   ☆ **1:15:** Mat 3:2   ☆ **1:22:**

Mat 7:28-29   ☆ **1:24:** Mak 5:7

nugunup divi amon? Nu watkukam nuntan onagana? Ne yaug anona ge bira. Ge God Apan Iyakaisi meuma.”

<sup>25</sup> Iesu gae yusipamit wane, “Gae yankweya! Me gumbe yankweg dauwaya!” <sup>26</sup> ☆ Airapu kukaeba mu apan yusi-pamit ipuniyane, me gumbe awauepam dauwag amiya.

<sup>27</sup> Iyayapan undag yaveg anoya, mu garawag anoya, “Mame divi? Mame toewanewan yusipama mataiwa? Me yusipamit airapu kukaeba dirumnewa, mu noiwa auya.” <sup>28</sup> ☆ Me umum meuma tatevit at Gariri apa undag wateteyamne.

### *Iesu Iyayapan Obiren Warinamunne*

<sup>29</sup> Koni mu sinagogu yankweg dauwag amiyawa, me Jemus ge Jon gaibu Saimon ge Andru gwe muma amiya.

<sup>30</sup> Saimon nimnagawa vesinawa yuwat amipam aug gweyau deriyat egave wakene. Iyayapan mu Iesu gumbe umum waya. <sup>31</sup> Me menan aine, me nanive aug enagadne yoine. Yuwat amipam onanane, me amatog munan amat munivi.

<sup>32</sup> Kum aigne augoiyau, iyayapan yuwat igiyawa ge airapu kukaeba doramnewa tam Iesu gumbe uwaya. <sup>33</sup> At toimu igiyawa undag ankwin noive agoniyag wakeya. <sup>34</sup> ☆ Iesu iyayapan obiren yuwat gina ubeube warinamunne. Me airapu kukaeba imne amiya. Me den baina wane airapu kukaeba divi da wape, kuiyawa mu anoya me bira.

### *Gariri Apa Iesu Opata Wane*

<sup>35</sup> ☆ Mumbevit aram muniwa apa, Iesu wan yoine, gwe kwene sira pontone arawa aike nun waivi. <sup>36</sup> Saimon ge me owowawiwa meuma menan yob onamiya. <sup>37</sup> Mu me

---

☆ 1:26: Mak 9:26 ☆ 1:28: Mat 4:24 ☆ 1:34: Mak 3:10-12 ☆ 1:35: Mat 14:23; Mak 6:46

yauyawa mu boboepaniyawa me diya, “Iyayapan undag genan yob eme!”

<sup>38</sup> Iesu garawa wane, “Marewan gwe manmanwa ampa ampa anta. Asimeve gaibu ne oma ane opata wak dirumpna, kuiyawa me oya onedna.” <sup>39</sup> ✧ Me at Gariri undag amdau birorot aine. Me sinagogu muma danave opata wak dirumne, sira airapu kukaeba imne amiya.

### *Iesu Apan Warinamne*

<sup>40</sup> Apan me yuwat warumne iviwa reprosi aunewa uwane. Me koniwa yug nun wane, “Nenan ano negawa, ge waribiya nega oraimina atna.”

<sup>41</sup> Iesu danadawai aune, me naniwa ereriyane apan gumbe yum dig wane, “Ne imunap, oraimina al!” <sup>42</sup> Tatevit yuwat warumne iviwa reprosi yankwene, sira me oraimina ane.

<sup>43</sup> Iesu gwangwan yusipamit gaibu tatevit me baraune aine, <sup>44</sup> ✧ me apa didne, “Yaukapa. Iyayapan da den diruma. Megara gembovit ag pirisi gumbe toyauwana. Sira Mosisi gwangwan wanewa mina gembo muintan oya puyo barauwa wana me gumbe iyayapan yaug anope ge oraimina ana.” <sup>45</sup> Megara aike amatog me iyayapan umum dirum wane. Gae mame wateteyamne. Meoya, Iesu at kokawa oma den ane taibe aine, me iyayapan onanwa arawa apa daieve aig wakene. Megara iyayapan mu ampa ampa omeg me gumbe uwaya.

## 2

### *Iesu Apan Da Amananiwa Buburuimusiawa Warinamne*

<sup>1</sup> Kum oiyat dawa apa, Iesu Kapenaum unigne, iyayapan anoya me gweyau onne. <sup>2</sup> Iyayapan obiren uwag agoniyaya. Gwe danawa at da den wakene ankwin noiwa

---

✧ 1:39: Mat 4:23; 9:35    ✧ 1:44: Rvt 14:1-32

gaibu noidauwane. Me gae wag dirumne. <sup>3</sup> Apan duwam ge duwam mu apan amananiwa buburuimusiawa yotug me gumbe onamiya. <sup>4</sup> Me kumive mu oma den ane me aug Iesu gumbe barauya, kuiyawa iyayapan noidauwane. Mu Iesu egave gwanob yayag apan amananiwa buburuimusiawa parauvinne gomaepam murap kwigieneya aigne. <sup>5</sup> Iesu anotumat muma yawamne, meve apan me amananiwa buburuimusiawa gumbe wane, “Utunwa, kukaeba geuma anog yankwene.”

<sup>6</sup> Megara Gwangwan toewanewan igiyawa upeba mu asime wakeya, mu danowo wag dirumiya, <sup>7</sup> “Apan mame divi oya gae mamaib wane? Me God gumbe watkukamivi. Bira me oma ane kukaeba anog yankwetan, God mekut ape?”

<sup>8</sup> Iesu tatevit me guwawa meuma gumbe mame anone divi mu danowo anoemewa, sira me wak dirumne, “Divi oya ye mame anoene? <sup>9</sup> Ambuwa me taibe; ne watna, apan amananiwa buburuimusiawa gumbe, ‘Ge kukaeba geuma anog yankwena,’ da watna, ‘Wan yoiya goma geuma aug aga.’ <sup>10</sup> Megara, ne imunap ye yaug anoya. Apan Usiwa\* me piyu egave yusiwa gaibu, me oma ane kukaeba anog yankwepe.” Meve me amananiwa buburuimusiawa abnawa dig wane, “Ne ge dirukna, wan yoiya, goma geuma aug gwe aga.” <sup>11</sup> “Ne ge dirukna, wan yoiya, goma geuma aug gwe aga.” <sup>12</sup> Me wan yoike, goma meuma aug mu undag namuwo dauwag aine. Mu undag mame gumbe teraya, sira mu God waragasiya waya, “Nu meis da den yavetewa!”

### *Iesu Rivai Menan Auwane*

<sup>13</sup> Iesu sira awau visive aine. Iyayapan obiren me gumbe onamiya, me amatog wag toyau munne. <sup>14</sup> Me aiviwa, me Rivai me Arupies usiwa takesi tamivi abnawa gweyawa

---

\* **2:10:** Me Iesu Keriso.

kusi apa wakene yaune. “Amanap onaga,” Iesu me dine, Rivai wan yoik amave aine.

<sup>15</sup> Iesu me Rivai gweyave augoi nakwaeba naiviwa, yauya, takesi tameme igiyawa ge kukaeba igiyawa obiren uwag Iesu ge me aigowawa gaibu nakwai neme. Kuyawa iyayapan obiren mu mina Iesu amave amome.

<sup>16</sup> ✨Gwangwan toewanewan igiyawa mu Parisi igiyawa, me iyayapan kukaeba ge takesi tamemewa gaibu neme yawamiya. Mu singui aigowawa gumbo waya, “Divi oya me takesi tamemewa ge iyayapan kukaeba gaibu wakeg neme?”

<sup>17</sup> Iesu mame anone mu dirumne, “Ui oraimumu igiyawa mu doketa oya den anoeme, megara yuwat igiyawa mu doketa oya anoeme. Ne iyayapan oraiwa auwatan oya den uwana, go iyayapan kukaeba oya munan uwana.”

### *Iesu Gumbe Kwit Oya Singui Aya*

<sup>18</sup> Gare Jon aigowawa ge Parisi igiyawa kwit eme. Iyayapan upeba uwag Iesu gumbe singui aya, “Jon aigowawa ge Parisi igiyawa aigowawa mu kwit eme, megara geumawa mu onan. Me aninin?”

<sup>19</sup> “Memgebip abnawa me amdau igiyawa meuma gaibu wakeyawa, oma ane kwit ape? Mu me gaibu wakeyawa oma den ane kwit ape. <sup>20</sup> Megara kum uwape me memgebip abnawa gumbo aug aipe. Me kumiwa apa mu kwit ape.

<sup>21</sup> “Bira da wape musiwa mataiwa waremig wape namuwa gumbe den agenpe, me meib apewa, matai wape musiwa mataiwa me wape namuwa viviyotpe sira me koka ape. <sup>22</sup> Sira bira da wain mataiwa mae kwapiwa irut namuwa danave den egampe. Me meib apewa, wain me mae kwapiwa irutawa dumetpe, sira wain ge kwapiwa

---

✨ 2:16: Mat 11:19

irut duwam onanape. Meoya me wain mataiwa kwapiwa irutawa mataiwa danave egampe.”

### *Sabat Kumiwa Ayapaneba*

<sup>23</sup> Sabat Kumiwa da, Iesu me nau danave aivi. Me aigowawa amome. Mu amatog nakwai wiit† upeba tameme neme. <sup>24</sup> ✨Parisi igiyawa wag diya, “Yawa, divi oya mu Sabat Kumiwa apa Gwangwan togomeme?”

<sup>25</sup> ✨Me garawa wane, “Ye Devid ge owawa iyagon wakeyawa kumiwa me aninin ane? Ye basiyayana go onan? <sup>26</sup> ✨Me Abiataru me pirisi kokawa kumiwa apa, Devid me God gweyawa unigne brede me waribiyane nane. Me Gwangwaneba me pirisi igiyawa mukut nape. Sira me upeba aigowawa munne naya.”

<sup>27</sup> ✨Meve me wag dirumne, “Sabat Kumiwa me apan oya, sira apan me Sabat Kumiwa oya onan. <sup>28</sup> Meoya Apan Usiwa me Sabat Kumiwa Ayapaneba.”

## 3

### *Iesu Apan Naniwa Gegerainewa Wasiwamne*

<sup>1</sup> Iesu sinagogu danave unig aine. Apan naniwa gegerainewa asime apa wakene. <sup>2</sup> Iyayapan upeba mu Iesu pui yutan oya yaveg anoeme gae ambuwa ditom. Me Sabat Kumiwa apa warinampe go onan, yautan oya mu yangowa me gumbé wakene. <sup>3</sup> Iesu me apan naniwa gegerainewa gumbé aib wane, “Iyayapan namuwo wan yoiya.”

<sup>4</sup> ✨Meve Iesu wag dirumne, “Sabat Kumiwa Gwangwan gumbé ambuwa oraiwa: Oraiwa atanwa go kukaeba atanwa, inaiinai waita wantan go toinguttan?” Megara mu nouwa iyadmusia.

---

† 2:23: Bredi me nakwai wiit gumbé wareme. ✨ 2:24: Deu 23:25

✨ 2:25: 1Sm 21:1-6 ✨ 2:26: Rvt 24:5-9 ✨ 2:27: Deu 5:14 ✨ 3:4:

<sup>5</sup> Me birorot danapiripam yangut yawamne, anogugud ane mu nonowa yaigipam. Sira apan me digwane, “Nanigwa atan dima.” Me naniwa siwadne oraimina di ane. <sup>6</sup> ✧ Meve Parisi igiyawa dauwag amiya, sira Erod igiyawa gaibu mu aninin akape Iesu totan oya, mu iyapeba paneme.

### *Iyayapan Obiren Iesu Amave Amiya*

<sup>7</sup> Iesu me aigowawa gaibu awau amiya. Iyayapan obiren mu Gariri apa onamiyawa amowo amiya. <sup>8</sup> Mu me aiviwa undag anoyawa, Judia, Jerusarem, Idumia ge at kokawa birorot me Jodan gambenwa, ge Taiya ge Saidon birorot apa iyayapan obiren me gumbe uwaya.

<sup>9</sup> Me aigowawa dirumne, “Iyayapan obiren oya ne iyayapan asinut siririyatna. Wa kusikarenwa aug negiya.”

<sup>10</sup> ✧ Me iyayapan obiren warinam munne, meoya yuwat igiyawa me yumtan oya garaman ag me gumbe uwaya.

<sup>11</sup> ✧ Airapu kukakaeba me yavemewa, mu me namive uyug aigek kwaruwaya, “Ge God Usiwa.” <sup>12</sup> ✧ Megara Iesu yaigipam dirumne, umum den wape ne bira.

### *Iesu Apasoro\* 12 Tamne*

<sup>13</sup> Iesu tui dog aine. Iyayapan me anoiviwa munan auwane. Mu menan onamiya.

<sup>14</sup> Me aigowawa 12 tamne. Mu me gaibu, sira opata waigimtan tepe ampe, <sup>15</sup> sira mu yusiwa auk airapu kukaeba atatai impe. <sup>16</sup> ✧ Iyayapan mame mu aigowawa 12 om yuwamnewa: Me Saimon ug Pita yune; <sup>17</sup> ✧ sira Jebedi usitainawa Jemus ge gwaneba Jon gumbo me ivuwa

---

✧ 3:6: Mat 22:15-16 ✧ 3:10: Mat 14:36 ✧ 3:11: Ruk 4:41 ✧ 3:12: Mak 1:34 \* 3:12: Apasoro me ewamuniviwa da ube. ✧ 3:16: Jon 1:42 ✧ 3:17: Ruk 9:54



Boanaji munne, me natawa aegnaminin ge kapisi usi-tainawa. <sup>18</sup> Andru, Pirip, Batoromiu, Matiu, Tomas, Jemus me Arupies usiwa, Tadaiyas, Saimon me Jerot abnawa.†

<sup>19</sup> Isukariot Judas, me Iesu ominawa baraunewa.

### *Iesu Ge Berujeburu‡*

<sup>20</sup> Meve Iesu gwe unigne. Sira iyayapan obiren ago-niyaya, meoya me ge aigowawa mu nakwai natanwa kum onan. <sup>21</sup> Iesu inawa tatawaiwa ge yogeyawaiwa mame anoyawa, mu autan onamiya. Kuyiawa mu waya, “Me kuiya kukaine.”

<sup>22</sup> ☆ Sira Gwangwan toewanewan igiyawa mu Jerusarem apa onamiyawa waya, “Berujeburu me wait aune! Airapu kukaeba kokawa usiwa gumbe me airapu kukaeba atatai imivi.”

<sup>23</sup> Meoya Iesu munan auwane onamiya, meve me gae maibe gumbe mu dirumne: “Seitan me aninin Seitan atatai itan? <sup>24</sup> Toimu togomiyak ge yoik apewa, gwetoimu me oma den ane yoipe. <sup>25</sup> Sira gwe togomiyak ge yoik apewa, gwe me oma den ane yoipe. <sup>26</sup> Sira Seitan me danave mut ape togomiyak yoik apewa, me den yoipe onanape. <sup>27</sup> Natawa di, bira da me apan yusipam gweyawa unig dividivi meuma tamtan anopewa, namu apan yusi-pama den tupewa, oma den ane gwe dana unig dividivi tampe. Meoya namu tukapa, meve dividivi bope. <sup>28</sup> Ne natawa diruitna, apan kukaeba apewa go God gumbe ano kukam wapewa mu anog yankwepe. <sup>29</sup> Megara bira da Guwawa Iyakaisiyapama gumbe ano kukam wapewa, me den anog yan kwepe. Me yaibobot kukaeba meuma ane onan den ape.”

---

† **3:18:** Jerot me dam iviwa. ‡ **3:19:** Berujeburu me airapu kukaeba iviwa. ☆ **3:22:** Mat 9:34; 10:25

<sup>30</sup> Me mame wane. Kuyawa mu veme, “Iesu me airapu kukaeba aune.”

*Iesu Inawa Ge Tatawaiwa*

<sup>31</sup> ✠ Iesu inawa ge gwanebaiwa uwaya. Mu daieve yokeg ud da barauya unig menan auwane. <sup>32</sup> Iyayapan obiren mu birorot me gumbé yan wakeya mu wak diya, “Inag ge gwanebaiwa gwe daieve wakeg genan jobeme.”

<sup>33</sup> Me singui wane, “Ne inan ge tatanaiwa mu bira?”

<sup>34</sup> Me iyayapan mu ikukuk paneg wakeyawa birorot yawamne, dirumne, “Ne inan ge tatanaiwa mawa wakeya!

<sup>35</sup> Da bira me God anowawa aiviwa me tatangwanen ge yogiyaniwa ge inan.”

## 4

*Yawa Emeiviwa Abnawa Maibeyawa*

<sup>1</sup> ✠ Sira Iesu amatok awau visive toyaumunne. Iyayapan obiren me gumbé uwaya. Meoya me awau egave wa danawa unig yan wakene. Iyayapan obiren mu awau visive wakeya. <sup>2</sup> ✠ Iesu dividivi undag gae maibe gumbé toyau munne. Me toyaumunnawa danave aib wane, <sup>3</sup> “Anoya! Nau abnawa me yawa tam vettan aine. <sup>4</sup> Me yawa emeiviwa, upeba ebu taibe aigiya. Nenip uwag naboriya. <sup>5</sup> Upeba an egave aigiya, asime piyu koka onan. Mu tatevi dumiya, kuyawa piyu kusi da egave. <sup>6</sup> Megara kum dauwag mu igamne undag toyaimusia, kuyawa mu taiwa epampa den aigiya. <sup>7</sup> Yawa upeba gan danave aigiya. Yawa yaig yoiya, go gan warumne, meoya natawa den inne. <sup>8</sup> Sira upeba piyu oraiwa gumbé aigiya. Me yaig yoiya koka aya natawa iniya. Me 30, 60, 100 mina natawa inamiya.”

---

✠ 3:31: Mak 6:3; Jon 2:12; Apa 1:14 ✠ 4:1: Mak 3:7-9; Ruk 5:1-3 ✠ 4:2: Mat 13:34; Mak 4:33-34

<sup>9</sup> Meve Iesu wane, “Da bira anotan oya naunawa gaibu ipewa me anope.”

<sup>10</sup> Iesu mekut wakenewa, aigowawa 12 ge upeba da mu me gumbé birorot wakeyawa, mu gae maibe meuma oya singui waya. <sup>11</sup> Iesu mu dirum wane, “God toimuwawa anoano guwavewa me wait toyau yenna. Megara asipa painauwa igiyawa mu gumbo dividivi undag gae maibe gumbé dirum veni. <sup>12</sup> ✧ “Mu yaveme megara den auveme, sira anoveme megara den yaug anoeme; mu kukaeba muma anak den yankwepe!” me meib.

<sup>13</sup> Meve Iesu mu dirumne, “Ye gae maibe mame den anoene? Aninin akape ye gae maibe da anoene?”

<sup>14</sup> Nauwaruat abnawa me gae emeivi. <sup>15</sup> Iyayapan upeba mu yawa ebu taiba mina. Mu gae anopewa, tatevit Seitan uwak gae mu danowo emenewa tam aipe. <sup>16</sup> Iyayapan upeba mu yawa mu an egave mina. Mu gae anopewa tatevit degadega gumbé aupe. <sup>17</sup> Megara taiwa onan, meoya kum koni pipi aigimpe. Gae gumbé ibnawa go edawai uwapewa, mu tatevit a ampe. <sup>18</sup> Iyayapan upeba da mu yawa gan danave mina. Mu gae anope, <sup>19</sup> ✧ megara piyu mame anoano meuma anopewa, tawara ugai mumpewa, dividivi undag da atanwa anoemewa mu unig gae tobotpe, meoya natawa den impe. <sup>20</sup> Iyayapan upeba mu yawa piyu oraiwa gumbé mina. Mu gae anope, aupe, sira mu 30, 60, 100 mina natawa inampe.”

### *Damempa Maibeyawa*

<sup>21</sup> ✧ Me wak dirumne, “Ye dun kabum go deriyat ankwatave barautan oya aug oniyana? Garawa ye me dun yokeiviwa egave barauya. <sup>22</sup> ✧ Dividivi undag me guwawe wakenewa me taibe ape, sira dividivi undag guwavewa me

---

✧ 4:12: Ais 6:9-10; Apa 28:26-27   ✧ 4:19: Mat 19:23-24   ✧ 4:21: Mat 5:15; Ruk 11:33   ✧ 4:22: Mat 10:26; Ruk 12:2

watappe. <sup>23</sup> Da bira anotan oya naunawa gaibu ipewa me anope.”

<sup>24</sup> ☆Sira me meib wane, “Anoenewa yaimoyai anoya. Ye om yuyawa, ebu desirom mina me matai om yuepe,—sira egave yempe. <sup>25</sup> ☆Da bira aunewa me sira kokavit aupe. Megara, da bira den aunewa, divi aunewa me gumbe atan aupe.”

### *Yawa Yaiviwa Maibeyawa*

<sup>26</sup> Me sira wane, “God toimuwawa me mame mina. Apan yawa piyuwau emene. <sup>27</sup> Aram ge kum, apan me kubvinivi wan yoiviwa, yawa toen dumivi yaivi, go me aninin yaivi den yaug anone. <sup>28</sup> Piyu me mekut natawa inivi—namu powawa, meve begawa, meve begawa danave natawa inivi. <sup>29</sup> ☆Me natawa kweraipewa, tatevit deba gumbe gomiyape, kuiyawa maura kumiwa uwane.”

### *Gayum Yawa Maibeyawa*

<sup>30</sup> Sira me wane, “God toimuwawa me divi mina anin waton, sira divi gae maibe nu anin waton? <sup>31</sup> Me gayum yawa mina, me yawa kudnausiren me ge piyuwau emegewa. <sup>32</sup> Megara me emenewa, me yaig yoipe, nau danave dividivi undag wakeyawa danowo me kokavit ape, sira me naniwa koka yupe, nenip painauwa uwag gugupave wakeigimpe.”

<sup>33</sup> Iesu me gae wak dirumne gae maibe obiren gina desiroma gumbe. Mu undag yaug anoya mina ane. <sup>34</sup> Me maibe den kwene dividivi undag maibe gumbe dirumne. Megara me aigowawa mukut, gumbo natawa taibe wane.

### *Iesu Wane Taig Kokawa Memeyaine*

<sup>35</sup> Oiyat me augoiyau uwanewa, me aigowawa dirum wane, “Nu anta asiwa visi gambenwa.” <sup>36</sup> Iyayapan mu

---

☆ **4:24:** Mat 7:2    ☆ **4:25:** Mat 13:12; 25:29; Ruk 19:26    ☆ **4:29:** Joe 3:13; Rev 14:15

kwemiya. Me wa danave, mu me mina gaibu amome. Asimeve me mina wa upeba gaibu amome. <sup>37</sup> Meve taig okup uwag yawarat wa umne. Yoi wa noidauwane. <sup>38</sup> Iesu wa namive unan yug kubvinivi. Aigowawa me togwanamiya, wag diya, “Ewanewan, ge nu den amat anuna nonunwa napewa?”

<sup>39</sup> Me wan yoine, taig dig wane sira yawarat gumbe dine, “Iyagisia! Ipunapun onan!” Meve taig aig botone, sira awau botone.

<sup>40</sup> Me wag dirumne, “Divi oya ye a ene? Ye ande anotumat onan?”

<sup>41</sup> Mu a akape gara wa aya, “Mame me bira? Taig ge yawarat me noiwa auya!”

## 5

### *Apan Me Airapu Kukaeba Gumbewa Iesu Warinamne*

<sup>1</sup> Mu at Gerasa me poeman gambenwa dauwag amiya. <sup>2</sup> Iesu wa kweg dauwag onnewa, apan me airapu kukaeba gumbewa me nuntosatan oya babat apa uwane. <sup>3</sup> Apan mame babat apa vinivi. Bira da oma den ane tupe, aiyen murapeba sein gumbe tuya go oma den ane. <sup>4</sup> Kuyawa me kapet go aiyen murapeba sein gumbe naniwa ge amawa evedni tueme, megara me aiyen murapeba sein gomiyane sira kapet me amawa tuiyawa gomiyane. Bira da yusipama onan me aug baraupe aikpe. <sup>5</sup> Meoya kum ge aram yampot apa ge tui gumbe me it awau epam membovit an gumbe ingan toivi.

<sup>6</sup> Me Iesu asipa painau yaunewa, me kintog namive aig konive yune. <sup>7</sup> ☆ Me kwat kuyaven wane, “Ge nu gunup divi amon, Iesu, God Painauvitwa Usiwa? God namive agi wa. Ge dawai den nega!” <sup>8</sup> Kuyawa Iesu me gumbe wane, “Ge airapu kukaeba, apan mame gumbe dauwa!”

---

☆ 5:7: Mak 1:24

<sup>9</sup> Iesu me gumbe singui wane, “Ge ivugwa anin?” Garawa wane, “Ne ivunwa me Riijon, kuiyawa nu aboit.”

<sup>10</sup> Sira me Iesu gumbe nun wa ge wa ane, at mame apa den tepe ampe.

<sup>11</sup> Bui obiren koni tui gambenwa apa mo muneme.

<sup>12</sup> Me airapu Iesu gumbe nun wane, “Tenuna anta bui danowo, baina wa, anta bui danowo unikta.” <sup>13</sup> Me gumbo baina wane, sira meve airapu kukaeba uwag dauwaya bui danowo amiya. Bui undag 2,000 mina, erai wareg aigeg awau apa nonowa naya boriruwaya.

<sup>14</sup> Iyayapan mu bui amaremewa kintog amog at kokawa ge at gwetoimu apa mame dirumiyawa, iyayapan dauwag divi aninin anewa yautan onamiya. <sup>15</sup> Mu Iesu gumbe onamiyawa, mu yauya apan me danave airapu kukaeba obiren dadi\* wakeyawa. Me wape enne, kuiyawa oraiminavit gumbe yan wakene. Mu a aya. <sup>16</sup> Mu me yauyawa iyayapan gumbo dirumiya apan me airapu kukaeba pannewa gumbe anin ane, sira dirumiya bui gumbo anin anewa gaibu. <sup>17</sup> Meve iyayapan amatog Iesu dig waya at muma kweg aipe.

<sup>18</sup> Iesu amatog wa avig aiviwa, apan me airapu kukaeba pannewa uwag wane ne gaibu anta. <sup>19</sup> Iesu me baina den wane, sira wane, “Vesin ud munan taig aga, diruma Ayapan anintom ge gungap ane sira ano gennewa.” <sup>20</sup> Meoya apan me at Dekaporis gumbe aike amatog dirumne Iesu anintom menan ane. Meve iyayapan undag anog teraya.

#### *Otau Boanewa Ge Vesin Yuwaranewa*

<sup>21</sup> Iesu sira wa gumbe awau gambenwa ainewa, iyayapan obiren Iesu gumbe agoniyaya. Me awau visive wakewewa, <sup>22</sup> sinagogu† amaravi abnawa da, iviwa Jairos,

---

\* **5:15:** Baiboru danave tenewa me Riijon. Natawa me mut igiyawa kuiya da. Me danave mut igiyawa 6,000 mina wakeya. † **5:22:** Me Ju nun gweyawa mina.

asime uwane. Iesu yaunewa me amave aigne, <sup>23</sup> Iesu gumbé nun wa ge wane, “Ne gwaitanwa kudnausiren me boaivi. Garawapa onakpa ge nanigwa gumbé baraupa, me aninapa inaig wakepa.” <sup>24</sup> Meoya Iesu me gaibu amiyawa, iyayapan obiren amave amog birorot empaniya. <sup>25</sup> Vesin da me bairawan 12 danave ganigani wariviwa asimeve wakene. <sup>26</sup> Doketa obiren yauya megara den warinamiya danadawai kokavit me aune. Sira dividivi meuma undag gumbé wakenewa mumbodne, go inai den aune yuwat koka ande wakene. <sup>27</sup> Me Iesu oya veme anonewa, me on iyayapan yapowo yoig daieven wapeyawa yumne. <sup>28</sup> Kuyawa me anone, “Wapeyawa yumpna ipewa, ne inaightna.” <sup>29</sup> Tatevit me ganigani wariviwa gomane. Me uuiwa danave demtawa aune dawai onanane.

<sup>30</sup> ☆ Iesu tatevit anone me yusiwa me gumbé dauwag aine. Me iyayapan yapowo birorot yavivi dirumne, “Bira ne wape yumne?”

<sup>31</sup> Aigowawa meuma garawa waya, “Ge yavege iyayapan agoniyag ge manageme, ge singui divi oya vegan, ‘Bira ne yumnedne?’ ”

<sup>32</sup> Iesu me bira ane yawatan oya di birorot yavivi. <sup>33</sup> Meve vesin me aninin me gumbé matadne yaug anone. Daramipam uwake Iesu amave aigne natawa undag dirum wane. <sup>34</sup> ☆ Iesu dig wane, “Gwaitanwa! Anotumat geuma warinam genne. Yum gumbé aga, dawai geuma auegewa onanane.”

<sup>35</sup> Iesu gae ande waiviwa, iyayapan upeba Jairos me sinagogu amaraivi abnawa gweyawa apa uwag waya, “Ge gwaitagwa me boane. Divi oya toewanewan gumbé wayug wayug ege?”

<sup>36</sup> Iesu gae muma veme anonewa, sinagogu amaraivi abnawa gumbé wane, “A den a. Di anotumat a.”

---

☆ 5:30: Ruk 6:19 ☆ 5:34: Mak 10:52; Ruk 7:50; 17:19

<sup>37</sup> Me den bairawan wane bira da gaibu amave aipe. Pita, Jemus ge Jon me Jemus gwaneba mu mukut. <sup>38</sup> Mu sinagogu amaraivi abnawa gweyawa meuma uwayawa, Iesu yawanne mu danadawai gumben iruveme sira it aen gaibu veme. <sup>39</sup> Me aig unig dirumne, “Divi oya ye wayug wayug ge it aen venan? Ud den boane, me di kubvinivi.” <sup>40</sup> Mu Iesu gumben towaya. Namu Iesu iyayapan undag bog tene dauwag amiya, ivi ud mamawa inawa ge me aigowawa mu me gaibu tam ud ampa wakenewa me unig aine. <sup>41</sup> ☆ Me ud nanive aug dig wane, “Tarisa kum!” (Me natawa, “Otau, genan veni, wan yoiya!”) <sup>42</sup> Tatevit otau wan yoig birorot aine. (Me bairawan 12 onanane.) Mu mame gumben tet kokavit aya. <sup>43</sup> Iesu gwangwan kokavit munne bira da mame den wape anope. Me dirumne nakwai da otau wampe nape.

## 6

### *Propeta Ebnotu Onanwa*

<sup>1</sup> Iesu asime kwemne, gwetoimu meuma aine. Aigowawa amave amiya. <sup>2</sup> ☆ Sabat Kumiwa uwanewa, me sinagogu danave amatog toyau munne. Iyayapan obiren me anoyawa anog teraya. Mu singui aya, “Apan mame divi mame aiviwa ampa tamne? Sira me anoano oraiwa mame wannewa ge irayauyau aiviwa me divi gumben aune? <sup>3</sup> Apan mame me gwe sisi abnawa, onan? Mame me Meri usiwa ge Jemus, Josep, Judas ge Saimon tatawa, onan? Me yogiyawawiwa mapa nu gaibu wakeya, onan?” Mu Iesu gumben anotumat den aya.

<sup>4</sup> ☆ Iesu wag dirumne, “Propeta me gwetoimu meuma, iyayapan meuma, gwe meuma danowo mekut ebnotu gumben da onan.” <sup>5</sup> Me asimeve irayauyau den ane. Me



anewa me naniwa yuwat igiyawa upeba kuiyovo tene inaimusia. <sup>6</sup> Sira Iesu anotumat muma onan oya terane. Meve Iesu gwe gwe gumbo birorot aine toyau mumne.

*Iesu Apasoro 12 Tene Amiya*

<sup>7</sup> Apasoro 12 munan auwane gumbe uwaya. Mu duwam duwam tene amiya. Airapu kukaeba atatai imtan oya yusiwa munne. <sup>8</sup> ✧ Mame gwangwan meuma: “Amdau oya divi da den auya. Tutu mekut auya, breidi onan, ikwai onan, powawa berip danave anmaga onan. <sup>9</sup> Sandoro mekut tuya, go gweb ankwatavewa duwam den eniya. <sup>10</sup> Evedni evedni gwe ambuwa unigimiyawa, asime wakeigimiya, meve at gwe me kweya. <sup>11</sup> ✧ Ye at ambuwa uwaya den baigan yempewa go gae yeuma den anopewa, mu yang anotan oya amedanawa atapupu toya aikpe, meve at me kweya.”

<sup>12</sup> Mu amiya, sira iyayapan nonemagowa biroriyatan oya opata muniya. <sup>13</sup> ✧ Mu airapu kukaeba obiren atatai imiya, sira yuwat igiyawa obiren egowo oira egamiya, mu inaimusia.

*Babataito Abnawa Jon Me Meyawa Kwagomiyaya Botone*

<sup>14</sup> ✧ Iesu iviwa koka anewa, Kin Erod me anone. Iyayapan upeba waya, “Babataito abnawa Jon boriruwawaya igiyawa gumbo sira inaig yoine, meoya inaiinai ubeube yusiwa me gumbe nau aivi.”

<sup>15</sup> Upeba waya, “Me Eraija.” Sira upeba waya, “Me propeta da watavitwa mina.”

<sup>16</sup> Megara Erod me anonewa wane, “Jon me ne meyawa kwagomiyawanawa boriruwawaya gumbo sira inaig yoine!”

<sup>17</sup> Kuyawa Erod membo dirumne Jon aupe, yumeg tuya, aueg nog barauya. Mame me anewa Erod tatawa

---

✧ 6:8: Ruk 10:4-11   ✧ 6:11: Apa 13:51   ✧ 6:13: Jms 5:14   ✧ 6:14: Mat 16:14; Mak 8:28; Ruk 9:19-20

Pirip biviwa Erodias me aunewa oya. <sup>18</sup> ☆Kuiyawa Jon me Erod gumbé wane, “Ge tatag biviwa auwanawa me gwangwan gumbé oraimina onan.” <sup>19</sup> Meoya Erodias me Jon gumbé anog danapiriwane, me imive me tope boitan anone. Megara me mina den ane, <sup>20</sup> kuiyawa Erod me Jon gumbé a ane sira me papara vinne. Kuiyawa me anone Jon me apan iyakaisiyapama ge danawa esine abnawa. Erod me Jon opata waivi anonewa, anopipantum ane, megara me degadega gumbé anoivi.

<sup>21</sup> Meve ivi kum oraiwa uwane. Erod yainewa kumiwa apa me koukawa meumawa, mut igiyawa amaramunemewa, Gariri koukawa mumawa igiyawa munan buyunai tamne. <sup>22</sup> Erodias gwaitawa uwag unig tare wadne. Erod ge amdau igiyawa mu degadega aya. Kin me otau gumbé wane, “Divi da anoegewa ne gunap wa. Me ne gentna.” <sup>23</sup> Sira me gae gwangwan gumbé agi wane, “Ge divi da autan anoegewa ne gentna. Ge imugap at neuma kokawa gampenwa autan anoegewa me ne gentna.”

<sup>24</sup> Otau mame dauwag aig inawa dine, “Ne divi oya nun waten?” Me garawa wane, “Babataito Abnawa Jon kuiyawa wa.”

<sup>25</sup> Meoya otau me tatevit kinipam aig kin gumbé uwag nun wane, “Ne imunap Babataito Abnawa Jon kuiyawa. Gare mame di en egave baraug nega.”

<sup>26</sup> Kin danadawai kokavit anone. Megara agi meuma yaigipamit wane oya, sira iyayanan buyunai gumbewa yaveme oya, otau wanewa me topai den ane. <sup>27</sup> Kin me tatevit Jon kuiyawa aug ontan oya gae yusipam wane. Toinguttanwa abnawa baraune aine. Me nog danave unig aike Jon meyawa togomiyane, <sup>28</sup> sira kuiyawa en egave baraug aug taig onne. Me otau me wanne. Otau me inawa

---

☆ 6:18: Rvt 18:16

me wanne. <sup>29</sup> Jon aigowawa mame anoyawa uwag me kwapiwa aug yampot danave barauya.

*Iesu Iyayapan 5,000 Nakwai Utamne*

<sup>30</sup> ☆ Apasoro mu Iesu birorot empaniya. Mu dividivi ayawa ge toyau munnewa undag Iesu gumbe waya. <sup>31</sup> Me dirum wane, “At wayug wayug onan arawa ne gunap ye yekut oneya nonewa emiya.” Kuyawa iyayapan obiren uwa ge am emewa, mu nakwai muma natanwa kumiwa onan.

<sup>32</sup> Meoya mu mukut wa gumbe pontone arawa amiya. <sup>33</sup> Mu kwemum amiyawa iyayapan obiren mu yaug anoya. Meoya mu gwetoimu undag apa amowo kinipam amog asimeve namuwon uwaya. <sup>34</sup> ☆ Iesu wa avig on aigne iyayapan obiren yawamne. Me munan danadawai anone. Kuyawa mu sip mina mu sip amaraivi abnawa gaibu onan. Meoya me amatog toyautoyau obiren ane.

<sup>35</sup> ☆ Kum aigivi augoiyau uwaiviwa, aigowawa Iesu gumbe uwaya. Mu waya, “Mame gina inguiwa arawa, sira kum onanatan aivi. <sup>36</sup> Iyayapan kwema ampe, kuyawa mu oma ane at ama gampenwa go gweyowa ampe. Nakwai divi da mumbo gwiruwat nape.”

<sup>37</sup> Megara me garawa wane, “Ye nakwai da muniya.” Me gumbe waya, “Me 200 denari\* aupe! Nu anta bredi me 200 denari gumbe gwiruwak mu munta?”

<sup>38</sup> Iesu singui wag dirumne, “Ye bredi anintom tamiyan? Aiseg yauya.” Mu yawamiyawa aib waya, “Naningambenit ge gwambui duwam.”

<sup>39</sup> Meve Iesu mu dirum wane, “Ye iyayapan dirumiya kuiya dada wayo egave yan wakepe.” <sup>40</sup> Sira mu kuiya dada

---

☆ **6:30:** Ruk 10:17    ☆ **6:34:** Nam 27:17; Mat 9:36    ☆ **6:35:** Mak 8:1-9

\* **6:37:** Apan da oiyat desirom nau apewa me garawa 1 denari aupe.

100 go 50 yan wakeya. <sup>41</sup> Iesu brede 5 ge gwambui duwam bog kwimin wan yaune, me gaun gumbe wane, brede warensine. Meve me iyayapan namuwo mu tetan oya aigowawa munne. Me gwambui duwam gaibu mu undag kebag munne. <sup>42</sup> Mu undag naya oma ane. <sup>43</sup> Aigowawa brede ge gwambui naya musimusiwa pot 12 enamiya noidauwaya. <sup>44</sup> Apan mu nayawa me 5,000.

*Iesu Poeman Egave Aivi*

<sup>45</sup> Iesu tatevit aigowawa dirumne wa danave unigiya sira at Betuseida namiven amome, Iesu me iyayapan tene taig amiya. <sup>46</sup> ☆ Iesu iyayapan obiren yankwem, tui visi gambenwa nun watan oya dog aine.

<sup>47</sup> Augoiyau uwane. Wa awau dana bunangave yokene, Iesu mekut piyuwau wakene. <sup>48</sup> Me aigowawa yawamnawa mu bara wareg itan utan eme. Kuyawa taig gurivi. Arampuna kum koniwa duwamdesi wanteteyau me dauwag poeman egave amave munan aine. Me koni mu emariya muntan ane. <sup>49</sup> ☆ Mu Iesu poeman egave amave onivi yauyawa, mu yaug anoyawa me airapu. Mu kwaru waya. <sup>50</sup> Kuyawa mu undag me yauya a aya. Tatevit Iesu munan dirum wane, “Yusiyusi aya! Ma ne. A den aya.” <sup>51</sup> ☆ Meve me wa danave mu gaibu dauwag ainewa, taig memeyaig aigne. Mu teraya guwowa puk wane. <sup>52</sup> Kuyawa mu brede gumbe den yai yaug anoya. Mu nonomagowa yaigiwane.

<sup>53</sup> Awau gambenwa dauwag amiya piyu Genesaret apa uwaya, sira anika aoreya. <sup>54</sup> Mu wa gumbe dauwag onamiyawa, iyayapan tatevit Iesu irawa yawag anoya. <sup>55</sup> Sira mu at me undag gwe gwe kintoya. Mu Iesu ampa wakenewa anoyawa, yuwat igiyawa kem egave bog at me uwaya. <sup>56</sup> Sira me ainewa at ampa ampa—gwetoimu apa,

at koka apa, at diri gambenwa apa—mu yuwat igiyawa gwiruwaremewa arawa apa teya. Mu me gumbenwa nun waya Iesu wape meuma noibamawa yumpe. Iyayapan yumiyawa mu undag inaimusia.

## 7

### *Oraiwa Ge Miyotapam*

<sup>1</sup> Parisi igiyawa ge Gwangwan toewanewan upeba mu Jerusarem apa onamiya mu Iesu empaniya. <sup>2</sup> ☆Mu yawamiya Iesu aigowawa upeba mu nanuwa miyot den muinkapa nakwai neme. <sup>3</sup> Parisi igiyawa ge Ju igiyawa undag mu upanaiwa kuinui muma ag omome, meoya mu nanuwa den muinpewa nakwai den nape. <sup>4</sup> ☆Mu gwiruwaremewa arawa apa taig onampewa mu mumbo kwapuwa den muinpewa divi da den nape. Sira wagob-aviwa wakewake mumawa gwangwanepam obiren. Mu ap, noum, ui yaigipama, upeba gaibu muineme.

<sup>5</sup> Meoya Parisi igiyawa ge Gwangwan toewanewan singui Iesu gumbenwa waya, “Divi oya ge aigowagwa mu upanaiwa kuinui mumawa gaibu den amat nanuwa miyotapam gumbenwa nakwai nape?”

<sup>6</sup> ☆Iesu gara wag dirumne, “Aisaya me ye ugauga ene igiyawa guniyap wanewa baında wane. Me aib tene, ‘Iyayapan mame nouwa muma gumbenwa ebnotu nenan eme, megara imudanowo muma ne gunap painau.

<sup>7</sup> Mu imuwa undag ne gunap den waiya eme; mu iyayapan toyau toyau muma mekut toyau muneme.’

<sup>8</sup> Ye God Gwangwan meuma yan kweyana, iyayapan kuinui mumawa aug ongene.”

<sup>9</sup> Sira me wag dirumne, “Ye upeiwa ano muma amat ag ongetan oya God Gwangwan meuma atan barauyana!

<sup>10</sup> ☆Sira Mosisi wane, ‘Ye mameaiwa ge inelaiwa gumbo ebnotu amuniya.’ sira, ‘Bira da inawa ge mamawa gumbo anokukam apewa me matai tope boape.’ <sup>11</sup> Megara ye vene, apan da inamamawa gumbo aib wape, ‘Dividivi me ne yenan tamnawa me Korban ane’, (Korban me God puyowawa.) <sup>12</sup> ye me apan gumbe diya inamamawa oya divi da den ape. <sup>13</sup> Mamaib Ye upanaiwa kuinui yeuma gumbe God gae meuma yusi onan ane. Sira mame mina ye obiren ayana.”

<sup>14</sup> Iesu sira iyayapan obiren munan auwane menan onamiya, “Ye undag ne watna anoya, mame yaug anoya.

<sup>15</sup> ☆Divi da asipa daieve wakenewa me apan danave unikpe me oma den ane apan miyot ape. Megara apan gumbe dauwag onnewa me apan miyot ape.” <sup>16</sup> (-)\*

<sup>17</sup> Iesu iyayapan obiren yankwemne sira gwe unig ainewa, aigowawa me gumbe maibe mame oya singui waya. <sup>18</sup> Iesu dirumne, “Ye me kwiyea boredne? Ye den yaug anoyana, divi da me apan danave unignewa me oma den ane me miyot ape? <sup>19</sup> Kuiyawa me apan nonemagawa danave den unikpe, go danave unikpe, meve kwapive uwag aipe.” Iesu me mame waivi, me watabne nakwai undag oraimina.

<sup>20</sup> Sira me wane, “Divi da apan gumbe uwag oniviwa me apan miyot ape. <sup>21</sup> Kuiyawa apan danave wakeyawa, sira taibe watna, apan miyot ayawa me nonemagawa gumbe wakeya me dauwag omome. Mu ano kukaeba anoiviwa, vesin apan payaupayau, ub, toenguttan, yaug anogugurivi, <sup>22</sup> nunipama, ano kukam, ugauga, yaug anoguguraiwiwa, yano, membo iviwa wai yaivi, warago

---

☆ 7:10: Eks 20:12; 21:17; Deu 5:16 ☆ 7:15: Apa 10:14-15 \* 7:16: Namu tenewa upeba V16 oya aib veme. V16: Apan naunawa gumbe anotan anoiviwa me anope.

aiviwa. <sup>23</sup> Kukaeba mame undag apan danave dauwape. Me ape apan miyot ape.”

*Sairopenia Vesin Anotumat Meuma*

<sup>24</sup> Iesu at me yankweg at Taiya† megiyawa oya aine. Me gwe danave unignewa, me imive iyayapan me den yang anope, go me oma den ane guwape. <sup>25</sup> Vesin da me gwaitawa kusiwa airapu kukaeba aunewa me Iesu oya anone. Me tatevit uwane amave aigne. <sup>26</sup> Me at Griisu vesinawa, at Siria Penisia apa yaine. Me Iesu gumbe nun wane airapu kukaeba gwaitawa gumbe dauwag aitan oya.

<sup>27</sup> “Ud ususiwa kwema namu nape divi undag mu anoemewa,” Iesu wane, “Kuiyawa me oraimina onan ud bredi muma aug kweyau aoretna nape.”

<sup>28</sup> Vesin garawa wane, “Ayapan, me natawa. Megara, kweyau me teboro ankwatave wakenewa ud ususiwa bredi mumawa musimusiwa nape.”

<sup>29</sup> Me vesin gumbe wane, “Ge garawa geuma me oraiminavit! Aga. Airapu kukaeba ge gwaitagwa wait yankweg dauwag aine.”

<sup>30</sup> Vesin gweyawa aine yaune me gwaitawa parao viniviwa. Airapu kukaeba wait me yankweg dauwag aine.

*Iesu Naunawa Boredne Noiwa Borednewa Warinamne*

<sup>31</sup> Meve Iesu at Taiya yankweg at Saidon uwag aine, meve me sira Gariri poeman gumbe at Dekaporis megiyave uwane. <sup>32</sup> Me apa, iyayapan upeba apan me nauna boredne sira gae yaimoyai den waiviwa aug Iesu gumbe uwaya. Mu Iesu gumbe nun waya naniwa apan egave barautan oya.

<sup>33</sup> Iesu me iyayapan obiren yapowo me atan aune. Me naniguriwa duwam apan nauna nogave enne. Meve me gwitup emne apan pednawa yumne. <sup>34</sup> Me kwimin owan

---

† 7:24: Namu tenewa upeba veme Taiya ge Saidon.

yaune anogugut ane wag dine, “Epata!” Me natawa, “Me watapa!” <sup>35</sup> Meve apan naunawa watabne. Sira me pednawa bururuwane me amatog gae siwavit wane.

<sup>36</sup> ☆ Iesu gwangwan wag dirumne bira da den dipe. Iesu gae sira dirumne, megara iyayapan egave me oya gae wag amome. <sup>37</sup> ☆ Iyayapan tet kokavit ag waya, “Me dividivi anewa undag oraiminavit. Nauna borednewa me anone, noi borednewa me gae wane.”

## 8

### *Iesu Iyayapan 4,000 Nakwai Utamne*

<sup>1</sup> ☆ Kum me apa iyayapan obiren sira agoniyaya, go mu gumbo nakwai onan. Iesu aigowawa munan auwane onamiya. Me mu gumbo wane, <sup>2</sup> “Ne iyayapan mame oya danadawai aueni. Mu ne gunap wakeya kum duwamdesi wait onanane, go mu gumbo nakwai onan. <sup>3</sup> Ne mu tetna iyagon gwe ampe ipewa, mu ebu taibe matai yangowa viyape uyug aikpe, kuiyawa mu upeba aramavit onamiya.”

<sup>4</sup> Me aigowawa garawa waya, “Mapa gina inguiwa arawa. Ampa nu brede tamta iyayapan undag mame nape oma ape?”

<sup>5</sup> Iesu singui munne, “Ye guniyap brede anintom?” mu garawa waya, “Me 7.”

<sup>6</sup> Me iyayapan obiren dirumne piyu gerave yan wakeya. Me brede 7 tamnewa engaun wanne. Me wasig munne iyayapan namuwo tepe. Mu meib di aya. <sup>7</sup> Mu gwambui kusikusi upeba mina gaibu. Me me oya gaun wag aigo meuma dirumne keb ag mumpe. <sup>8</sup> Iyayapan naya oma ane. Ivi aigowawa mu musimusiwa wakeyawa tamiyawa pot 7 enamiya noidauwaya. <sup>9</sup> Iyayapan 4,000 mina wakeya. Meve Iesu tene amiya.

---

☆ 7:36: Mak 1:43-45    ☆ 7:37: Ais 35:5    ☆ 8:1: Mak 6:35-44



<sup>10</sup> Me wa dana aigowawa gaibu unig aig at Darumanuta oya amiya.

<sup>11</sup> Parisi igiyawa uwaya mu amatog Iesu singui aya. Me gumbe ageyau atan oya irakoniwa kwiminau toyaumuntan oya nun waya. <sup>12</sup> ✧ Iesu anogugut ane wane, “Divi oya iyayapan mame garewa mu irakoniwa oya nun veme? Ne natawa diruitna. Irawa da mu gumbo den mumpe.”

<sup>13</sup> Meve me mu yankwemne. Me taig wa danave unigne sira visi gambenwa oya togomiyane.

*Parisi Igiyawa Iist Mumawa Ge Erod Iist Meumawa*

<sup>14</sup> Aigowawa brede aug onantanwa oya imuwa atataine, megara brede en desirom di wa danave wakene. <sup>15</sup> ✧ Iesu mu gumbo gwangwan wane, “Yaukapa. Parisi iist muma ge Erod iist meuma gumbo yaukapa.”

<sup>16</sup> Mu gae garawa ano ag waya, “Me kuiyawa nu brede gunup onan.” <sup>17</sup> ✧ Garawano muma Iesu yaug anog singui dirumne, “Divi oya brede den auyana oya gae vene? Ye ande den di yauyana den di yaug anoyana? Ye nonemagewa yaigiwane?” <sup>18</sup> Ye yangewa gaibu, go oma den ane yauya, ye naunewa gaibu, go oma den ane anoya? Sira ye den imugiya? <sup>19</sup> ✧ Ne iyayapan 5,000 oya brede 5 kesanawa, musimusiwa pot noidauwayawa anintom ye tamiyana?” Mu garawa waya, “12.”

<sup>20</sup> “Sira iyayapan 4,000 oya brede 7 kesanawa, musimusiwa pot noidauwayawa anintom ye tamiyana?” Mu garawa waya, “7.”

<sup>21</sup> Me mu gumbo wane, “Ye ande den yaug anoyana?”

*Iesu At Betuseida Apa Yanga Bored Apan Warinamne*

<sup>22</sup> Mu at Betuseida uwayawa, iyayapan upeba yanga bored apan aug onamiya. Iesu me kwapiwa yumtan oya

---

✧ 8:12: Mat 12:39; Ruk 11:29    ✧ 8:15: Ruk 12:1    ✧ 8:17: Mak 6:52

✧ 8:19: Mak 6:41-44

nun gumbe waya. <sup>23</sup> Me yanga bored apan nanive aune sira aug at gwe yankweg dauwag amiya. Apan yangave me gwitup emne sira naniwa me gumbe baraune Iesu singui ane, “Ge divi da yavege?”

<sup>24</sup> Me meram wane, “Ne iyayapan yawameni. Mu yoma mina a gigeme.”

<sup>25</sup> Sira Iesu naniwa duwam apan yangawa duwam tene. Meve me yangawa watabne, me yangawa oraimina ane, sira me dividivi undag yaune esine. <sup>26</sup> Iesu me baraune gwe aine, wane, “Gwetoimu danave den unig aga.”

*Pita Taibe Wane Iesu Me Keriso*

<sup>27</sup> Iesu ge aigowawa at gwe Sesaria Piripi apa amiya. Ebu taibe me singui munne, “Iyayapan veme ne bira?”

<sup>28</sup> ☆ Mu garawa waya, “Upeba me Babataito abnawa Jon veme, upeba Eraija veme, sira upeba propeta da veme.”

<sup>29</sup> ☆ Iesu singui wane, “Megara ye anin? Ye vene ne bira?” Pita gara wane, “Ge Keriso.”

<sup>30</sup> ☆ Iesu mu gwangwan dirumne nenan oya bira da den diya.

*Iesu Bo Meuma Oya Namiven Wane*

<sup>31</sup> Me meve amatog toyau munne. Apan Usiwa\* dividivi obiren oya edawai aupe sira namuyoiyoi igiyawa ge pirisi koukawa ge Gwangwan toewanewan igiyawa mu me di topayape, sira me tope boape kum duwamdesiyawa sira inaig yoipe. <sup>32</sup> Mame oya me taibe di wane. Pita me Iesu megjyave baraug amatog yaigipam dig wane.

<sup>33</sup> Megara Iesu tobiyag aigo meumawa yangut yawamne Pita gumbe gae yaigipam dig wane, “Seitan, daienap uwag aga! Ge God dividivi meuma den anoege, iyayapan dividivi muma anoege.”

---

☆ 8:28: Mak 6:15    ☆ 8:29: Jon 6:68-69    ☆ 8:30: Mak 9:9    \* 8:31: Me Iesu Keriso.

<sup>34</sup> ✧ Meve Iesu iyayapan ge aigo meuma auwanewa mu onamiya. Me wane: “Da bira imive ne amanap ontan ape ipewa, me membo di topayape korosi meuma di wan aupe meve ne amanap ompe. <sup>35</sup> Kuyawa da bira imive inaiinai meuma waita wantan apewa me waropiyape, go da bira inaiinai meuma nenan oya ge gae oraiwa oya waropiyapewa me waita wampe. <sup>36</sup> Apan me piyu mame undag aupe, go guwawa meuma waropiyapewa oraiwa meuma aninin? <sup>37</sup> Apan me guwawa meuma sira autan oya me divi da garawa wampe? <sup>38</sup> ✧ Uinan taraki ge kukaeba eme kum mame gare danave, da bira nenan ge gae neumawa oya ubmam apewa, Mamawa eyawa meuma danave Apan Usiwa me aneya iyakaisi gaibu uwapewa kumiwa apa me apan asime gumbe ubmam ape.”

## 9

<sup>1</sup> ✧ Sira Iesu mu gumbo wane, “Ne natawa diruitna. Mapa yokeyawa yapowo upeba mu God toimuwawa yusiwa gaibu onivi yaupe, ivi mu boriruwape.”

### *Iesu Irawa Biroriyane*

<sup>2</sup> ✧ Oiyat 6 onananewa, Iesu me Pita, Jemus ge Jon tam tui painau dog amiya. Me apa undag mukut wakeya, sira mu namuwo me irawa biroriyane. <sup>3</sup> Me wapeyawa biroriyane di puipuyuren ane. Bira da oma den ane mame mina wape puipuyuren ape piyu mame danave. <sup>4</sup> Meve Eraija ge Mosisi mu namuwo uwaya. Mu Iesu gaibu gae veme.

<sup>5</sup> Pita Iesu gumbe wane, “Rabai, mapa nu waketu me oraimina. Mapa nu tent\* duwamdesi siyamta—desirom

---

✧ **8:34:** Mat 10:38-39; Ruk 14:27    ✧ **8:38:** Mat 10:33    ✧ **9:1:** Mak 13:30    ✧ **9:2:** Apa 3:22; 2Pi 1:17-18    \* **9:5:** Namu tenewa dawa me tabenako waivi. Tent me gugup gweyawa mina. Me wape yaigipam kokawa gumbe siyawa.

genan oya, desirom Mosisi oya ge Eraija oya.” <sup>6</sup> (Me den yaug anone anin watan, mu di teraya.)

<sup>7</sup> Meve irikup uwane mu undag umamne, sira noiwa irikup danave uwane: “Mame ne Utunwa nonenmagawa. Me gumbe anoigimiya!”

<sup>8</sup> Mu tatevit yangut birorot ayawa, da bira mu gaibu den yauya. Iesu mekut yauya.

<sup>9</sup> Mu tui apa aig omomewa, Iesu mu gae yusipam dirumne, da bira den diya divi mu yauyawa, me wakepe Apan Usiwa bo gumbe sira yoig wanekpeve. <sup>10</sup> Mu me yauyawa mukut yumnasiya. Mu gae garawano aya bo apa sira yoig wanekpe me natawa divi.

<sup>11</sup> ☆ Sira mu me gumbe dig waya, “Divi oya Gwangwan toewanewan muma waya me Eraija namu di uwape?”

<sup>12</sup> ☆ Iesu garawa wane, “Natawa di, Eraija namu uwape, sira dividivi undag waribiyape. Divi oya gigitum tene me Apan Usiwa edawai kokavit autanit di sira topayape?”

<sup>13</sup> ☆ Megara ne diruitna. Eraija wait uwane. Mu dividivi undag anoemewa me gumbe aya, me namu menan gigitum aninin tene mina.”

### *Iesu Ud Airapu Kukaeba Gaibuwa Warinamne*

<sup>14</sup> Mu aigo meuma upeba gumbo uwaya. Mu yauya iyayapan obiren mu gumbo aoreg wakeya, sira Gwangwan toewanewan igiyawa mu gaibu garadi eme. <sup>15</sup> Iyayapan undag Iesu yauyawa tatevit mu di terake gaun wantan oya menan kin tog amiya.

<sup>16</sup> Me dirumne, “Ye mu gaibu divi oya garadi ene?”

<sup>17</sup> Iyayapan obiren yapowo apan da garawa wane, “Toe-wanewan, ne ud neuma genan aug onegna. Me airapu kukaeba danave unigne gae watan oma den ane. <sup>18</sup> Airapu

---

☆ 9:11: Mak 3:1   ☆ 9:12: Sam 22:1-18; Ais 53:3; Mak 4:5-6   ☆ 9:13: Mat 11:14

kukaeba yumtan oya aiviwa me piyu gumbe aorene aigivi. Me noiwa poriman dauwaivi, donawa kitosiaivi, sira kwapiwa kwatataine. Ne aigo geuma gumbo nun wana airapu kukaeba atataitan oya dirumna, go mu oma den ane.”

<sup>19</sup> Iesu garawa wane, “A, iyayapan garewa anotumat den eme! Kum anintom mina ne ye gaibu waketna? Kum anintom mina ye guniyap ne iyagit waketna? Ud nenan aug oneya.”

<sup>20</sup> Meve mu ud aug onamiya. Airapu me Iesu yaunewa, tatevit ud aorene daramdaram ane sira piyu egave aorene aigne bautoivi, noiwa poriman dauwaivi.

<sup>21</sup> Iesu ud mamawa dine, “Kum anintom me mamaib ane?” “Ud torave apa,” me garawa wane. <sup>22</sup> “Kum evedni airapu kukaeba me toin guttanwa oya yoma yangave aorene sira yoi dana aorene. Megara ge oma ape ipewa, nu ano nuna sira waita nuna.”

<sup>23</sup> ☆ Iesu wane. “Ge wana, ‘Ge oma ape ipewa?’ Bira da anotumat apewa oma ane dividivi undag ape.”

<sup>24</sup> Ud mamawa tatevit gambena wane, “Ne anotumat eni. Waita nega anotumat den eniwa biroriyag anotumat oraimina atna!”

<sup>25</sup> Iesu iyayapan obiren kin tog omome yawamnewa me airapu kukaeba gumbe wakakae ane. Me wane, “Ge nauna bored ge noi bored airapuwawa, ne ge gungap gae yusipamit veni, me gumbe dauwag aga me danave sira den uniga.”

<sup>26</sup> ☆ Airapu kwaruwane, kwapiwa kwatataine me gumbe yankweg dauwag aine. Ud kwapiwa yauya bo kwapiwa mina di, undag waya, “Me boane.” <sup>27</sup> Megara Iesu nanive aune me enagadne amave wan yoine.

<sup>28</sup> Iesu gwe dana unig aine. Meve aigowawa me gumbe mukut singui aya, “Divi oya nu oma den ane vete dauwag aipe?”

<sup>29</sup> Iesu garawa wane, “Ebu mamaiba oma ane dauwag aipe nun gumbe mekut.”

<sup>30</sup> ☆ Mu at me yankweya Gariri uwag kweyag amiya. Iesu imive iyayapan da den yaug anope mu ampa wakeya.

<sup>31</sup> ☆ Kuiyawa me aigowawa toyau munivi, me wane, “Apan Usiwa ominawa iyayapan nanuwo baraupe. Mu tope boape, sira kum duwamdesiyawa sira inaig yoipe.”

<sup>32</sup> ☆ Megara mu den yaug anoya me anin wanewa sira mu me oya Iesu gumbe singui den waya. Mu a aya.

### *Kokavitwa Me Bira*

<sup>33</sup> Mu at Kapenaum uwaya. Me gwe danave unig ainewa, Iesu amatog singui munne, “Ye ebu taibe divi oya garawa anoene?” <sup>34</sup> Megara mu di iyadmusia, kuiyawa ebu taibe mu danowo kokawa bira me oya diguragut aya.

<sup>35</sup> ☆ Me yan wakenewa, Iesu aigo meuma 12 munan auwane onamiya sira dirumwane, “Da bira namu yoitan imive wakepewa, me di virioiyeba apa yoipe. Me iyayapan undag yapowo nau abnawa ape.”

<sup>36</sup> Me ud kusi da aune, sira me ane yapowo yokene. Me vitave aune mu gumbo wane, <sup>37</sup> ☆ “Da bira me ud usiusiwa da gumbe ne ivunwa gumbe engaun apewa, me ne gunap engaun ape; sira da bira me ne gunap engaun apewa, me ne gunap engaun den ape ne baraunedne onegnawa gumbe engaun ape.”

### *Da Bira Nu Gunup Daietaitai Den Anewa Me Numawa*

---

☆ 9:30: Jon 7:1    ☆ 9:31: Mak 8:31; 10:32-34    ☆ 9:32: Ruk 9:45

☆ 9:35: Mat 20:25-27; Mak 10:43-44; Ruk 22:24-26    ☆ 9:37: Mat 10:40

<sup>38</sup> Jon wane, “Toewanewan, nu apan da yautu, airapu kukaeba ge ivugwa gumbe wane dauwag amiya. Nu me yankwetan oya ditu, kuiyawa apan me numawa onan.”

<sup>39</sup> Iesu wane, “Me den toboriya. Da bira ne ivunwa gumbe irayauyau apewa, irayauyau onanapeve oma den ane nenan oya gae kukaeba da wape. <sup>40</sup> ✧Kuiyawa da bira me nu gunup daietaitai den anewa me numawa. <sup>41</sup> ✧Ne ye natawa diruitna. Da bira anone ye Keriso meumawa, me oya me yoi ap me ne ivunwa gumbe yempewa, natawa di garawa meuma matai den di waropiyape.

### *Ape Kukaeba Atanwa*

<sup>42</sup> “Megara bira da ud kusi mame ne gunap anotumat anewa desirom da ano gwambe toyau wampewa, an kokawa me parawa waremewa me meyave tug poeman danave aorepe none nape, me me oya me baina.

<sup>43</sup> ✧Nanigwa ape ge kukaeba a ipewa, kwagomiyag epa aoreya. Me oraiwa ge gungap kwapugwa kukaipewa inaiinai danave unig aga, go me kukaine nanigwa duwam gaibu aig at kukaeba geena<sup>†</sup> me iyam yaibobot igiviwa danave aiga. <sup>44</sup> (-)‡ <sup>45</sup> Sira amagwa ape ge kukaeba a ipewa, kwagomiya. Me oraiwa ge gungap ge amagwa desirom gumbe inaiinai danave unig aga, go me kukaine me amagwa duwam gaibu at kukaeba geena danave aore gempe aiga. <sup>46</sup> (-)§ <sup>47</sup> ✧Sira, yangagwa ape ge kukaeba a ipewa, topukiyag atan aoreya. Me oraimina ge gungap ge yangagwa desirom gumbe God toimuwawa unig aga, me

✧ **9:40:** Mat 12:30; Ruk 11:23    ✧ **9:41:** Mat 10:42    ✧ **9:43:** Mat 5:30

† **9:43:** Anotumat onan igiyawa mu at mame matai unikpe.    ‡ **9:44:**

Namu tenewa upeba V48 mina veme.    § **9:46:** Namu tenewa upeba V46

gaibu. Me tene, “Nagam den borirueme, sira iyam den botoivi.”    ✧ **9:47:**

Mat 5:29

oraimina, megara yangagwa duwam gaibu aore gempe at kukaeba geena danave aigawa me kukaine. <sup>48</sup> ☆ Me apa, “ ‘Nagam den borirueme, sira iyam den botoivi.’ ”

<sup>49</sup> Iyayapan undag matai iyam gumbe siuran mina ape.

<sup>50</sup> ☆ Siuran me oraimina, megara me demtawa meuma onanape ipewa, ye aninin aya demtawa sira ape? Siuran daneyap auya, undag yum gumbe wakeigimiya.”

## 10

### *Memgebip Garakue*

<sup>1</sup> Iesu at meve kweke at Judia aine, Jordan togomiyane. Sira iyayapan undag me gumbe uwaya. Kum evedni toyau muniviwa mina mu toyau munne.

<sup>2</sup> Parisi igiyawa upeba me gumbe uwaya amaorot aya, “Apan me biviwa gaibu garakue atan me Gwangwan gumbe baina wane?”

<sup>3</sup> Me garawa wane, “Mosisi Gwangwan aninin yenne?”

<sup>4</sup> ☆ Mu waya, “Mosisi apan meib baina wane, ‘Memgebip garakue oya vesin yankwetan gigrumawa teg wana kwegem vesin aipe.’ ”

<sup>5</sup> “Mosisi Gwangwan mame yenan tene, kuiyawa ye nonewa yaigiwa dadi.” Iesu garawa wane. <sup>6</sup> ☆ Megara wait namuiren dividivi wad tenewa, God apan ge vesin wad temunne. <sup>7</sup> ☆ Kuiyawa mame oya, apan mamawa ge inawa yankwe munke biviwa gumbe yunatpe, <sup>8</sup> sira apan ge vesin mu kwapuwa desirom ape. Meoya mu duwam onan, mu desirom. <sup>9</sup> Meoya God toboranewa, apan oma den ane tam ubeube tepe.”

---

☆ **9:48:** Ais 66:24    ☆ **9:50:** Mat 5:13; Ruk 14:34    ☆ **10:4:** Deu 24:1-4; Mat 5:31    ☆ **10:6:** Gen 1:27; 5:2    ☆ **10:7:** Gen 2:24; Epe 5:31-33



<sup>10</sup> Meve mu gwe danave wakeyawa, aigowawa mame oya singui waya. <sup>11</sup> ✧ Iesu gara wane, “Bira da biviwa yankwepe sira vesin da ube aupewa, me vesin namuwa gumbe uinantaraki. <sup>12</sup> Sira vesin memawa gumbe yankweg, apan da ube aupe ipewa, me memawa namuwa gumbe kukaeba atan aivi me uinantaraki aivi.”

*Ud Usiusiwa Ge Iesu*

<sup>13</sup> Iyayapan ud usiusiwa tam Iesu gumbe uwaya. Mu imuwo Iesu ud usiusiwa yumam waribiyak muntan oya. Megara Iesu aigo meumawa gae yusipamit mu dirumiya. <sup>14</sup> Iesu mame yaunewa danapiriwane mu gumbo wane, “Ud usiusiwa yan kwemiya nenan onampe, sira mu den toboriya. Kuyiawa God toimuwawa iyayapan meiba mu mumawa. <sup>15</sup> ✧ Ne natawa diruitna. Da bira me ud usiusiwa mina God toimuwawa den aupewa den di God toimuwawa unikpe.” <sup>16</sup> Sira Iesu ud usiusiwa bog agoniya munne, egowo naniwa barauk waribiya munne.

*Apan Mataiwa Tawara Abnawa*

<sup>17</sup> Iesu amatog ebu taibe aivinewa, apan da me kintog gumbe uwane, me namive konive yug dine, “Toewanewan oraiwa, divi akape inaiinai yaibobot auten?”

<sup>18</sup> “Divi oya wana, ne oraiwa?” Iesu garawa wane. “Da bira oraimina onan, me God mekut. <sup>19</sup> ✧ Ge Gwangwan yaug anoana. ‘Den toengura, uinantaraki den a, ub den a, gae ugauga den wa, den ugai mun dividivi muma tamigima, inag mamag gumbo ebnotu aigima.’ ”

<sup>20</sup> Sira me wane, “Toewanewan, ne undag mame wait ud toranap gumbe yumnad onedna.”

<sup>21</sup> Iesu me yangurag danadawai gumbe wane. “Ge anoano geuma desirom da gumbe yan aigana. Aga dividivi

---

✧ **10:11:** Mat 5:32   ✧ **10:15:** Mat 18:3   ✧ **10:19:** Eks 20:12-17; Deu 5:16-20

undag ge gungap wakeyawa tam guiruwara sira tawara onan igiyawa muna, ge kwiminaw garawa oraivitwa auwa. Meve amanap onaga.”

<sup>22</sup> Me kumive, apan mame kwanawa sig ginawa butuine. Me danadawai gumbe aine, kuiyawa me tawara kokavit gaibu.

<sup>23</sup> Iesu tobiyag aigo meuma yawam wane, “Tawara abnawa me God toimuwawa uniktanwa me yaigiwa dadi!”

<sup>24</sup> Aigo meumawa Iesu gaiyawa gumbe anog teraya. Iesu sira wane, “Ud neumawa, God toimuwawa uniktanwa me yaigiwa dadi. <sup>25</sup> Mae kameru me inup nogawa uniktanwa me taibe, megara tawara abnawa me God toimuwawa uniktanwa me yaigiwa dadi.”

<sup>26</sup> Aigo meumawa mu di teraya, sira gae garawano aya, “Bira da oma ane waita aupe?”

<sup>27</sup> Iesu mu yawam wane, “Apan me gumbe mame oma den ane, megara God gumbe oma ane. God dividivi undag oma ane.”

<sup>28</sup> Pita me Iesu gumbe wane, “Nu dividivi undag yankweg amagap ongete!”

<sup>29</sup> “Ne natawa ye diruitna,” Iesu garawa wane, “Bira da me nenan sira Gae oraiwa oya gwe, tatawaiwa, yogeyawaiwa, inawa, mamawa, usitainawa go nauwawa yankwempewa, <sup>30</sup> me kum garewa danave koniwa 100 mina aupe,—gwe, tatawaiwa, yogeyawaiwa, inawaiwa, usitainawa, nauwawa—sira edawai gaibu aupe—, kum mataiwa danave inaiinai yaibobot aupe. <sup>31</sup> ☆Megara iyayapan obiren namu yoiemewa mu ivi ape, sira ivi yoiemewa mu namu ape.”

### *Iesu Bo Meuma Gaiyawa Sira Wane*

---

☆ **10:31:** Mat 20:16; Ruk 13:30

<sup>32</sup> ☆ Mu dauwag Jerusarem dog amomewa Iesu me namu yoine, aigowawa undag teraya. Mu amowo amomewa undag a aya. Me aigowawa 12 tam megiyave tene, dirumne divi da me gumbe matatpewa. <sup>33</sup> Me wane, “Nu Jerusarem angete, sira Apan Usiwa matai pirisi koukawa ge Gwangwan toewanewan igiyawa gumbo anavi ape. Mu me bo atan oya dima yug baraupe, sira me aug Ju onan igiyawa gumbo baraupe. <sup>34</sup> Mu me gumbe yano wampe sira gwitup me gumbe emkwampe, murap gumbe tope, meve toengutpe. Kum duwamdesiyawa, sira inaig yoipe.”

### *Jemus Ge Jon Anoemewa*

<sup>35</sup> Jebedi usitainawa Jemus ge Jon mu Iesu gumbe uwag waya, “Toewanewan, nu imunup divi da nun gungap watawa nunan ge a.”

<sup>36</sup> “Dimbae da ne yenan oya aten?” me singui wane.

<sup>37</sup> Mu garawa waya, “Ge wag didnuna. Eyawa geumawa danave desirom nanigwa yutanwa apa wanekpe, sira dawa nanigwa ketaiwa apa wanekpe.”

<sup>38</sup> ☆ “Dimbae oya nun venewa ye me den yaug anoyana,” Iesu wane. “Ye oma ane yoi ap ne natnawa ye me naya, sira babataito me ne autnawa ye oma ane auya?”

<sup>39</sup> ☆ “Nu oma ane,” mu garawa waya. Iesu mu dirumne, “Ne ap neuma gumbe yoi natnawa ye naya, sira babataito me ne autnawa ye me gumbe babataito auya. <sup>40</sup> Megara ne naniyutanwa go naniketaiwa waketanwa me ne oma den ane yentna. At meiba bira God munan tamibarip anewa mu munan.”

<sup>41</sup> Aigo meumawa 10 mu gae mame anoyawa, Jemus ge Jon gumbo danopiriwane. <sup>42</sup> ☆ Iesu munan auwane

---

☆ **10:32:** Mak 8:31; 9:31    ☆ **10:38:** Mak 14:36; Ruk 12:50    ☆ **10:39:** Apa 12:2; Rev 1:9    ☆ **10:42:** Ruk 22:25-26

agoniyaya, wane, “Ye yang anoyana, Ju onan namuyoiyoi igiyawa mu iyayapan amat amuniya, sira iyayapan koukawa mu yutuwa painauvit iyayapan gumbo eme. <sup>43</sup> ☆ Megara ye gaibu onan. Ye bira da ye guniyap kokawa atan anoyawa me iyayapan ankwatowo nau aya, <sup>44</sup> sira bira da namuyoiyoi atan oya anoiviwa, me iyayapan undag munan ankwatave nau aiviwa atanit di. <sup>45</sup> Kuyawa Apan Usiwa iyayapan nau meuma atan oya den aig onne, megara me iyayapan munan nau atan oya sira inaiinai meuma wampe iyayapan obiren kukaeba muma oya garawa atan oya aig onne.”

*Yangabored Barutimias Sira Yaune*

<sup>46</sup> Meve mu at Jeriko uwaya. Iesu ge aigowawa iyayapan obiren gaibu gwetoimu kweemewa, yangabored abnawa Barutimias (Natawa me Taimias usiwa), me ebu megiyave yan wakeg dividivi oya nun waivi. <sup>47</sup> Meve me yang anonewa me Nasaret apan Iesu, me amatog kwaruwane, “Iesu, Devid Usiwa, ano nega!”

<sup>48</sup> Iyayapan obiren me diyag waya, sira me dig waya nogwa iyadgita, megara me kwaruwagewa ane, “Devid usiwa, ne ano nega!”

<sup>49</sup> Iesu tumag yoig wane, “Au menan waya,” mu apan yangabored oya auwaya, “Yutugwa auwa. Wan yoiya. Me genan auwaivi.” <sup>50</sup> Enwape meumawa epa aorene, sira me amave pisiag wan yoig Iesu gumbe onne.

<sup>51</sup> Iesu me singui wane, “Ge imugap ne dimbae genan atna?” Yangabored apan wane, “Rabai,\* ne yautan anoeni.”

<sup>52</sup> ☆ Iesu me gumbe wane, “Aga. Anotumat geuma warinam genne.” Me tatevit yangawa oraimina ane, Iesu amave ebu taibe aine.

☆ **10:43:** Mat 23:11; Mak 9:35

\* **10:51:** Natawa me toewanewan.

☆ **10:52:** Mak 5:34

# 11

## *Iesu Eyawa Gumbe Jerusarem Unig Aine*

<sup>1</sup> Mu at Jerusarem uweme tui Orivu kuiyave at Betepage uwayawa, Iesu aigowawa duwam tene amiya, <sup>2</sup> dirum wane, “Gwetoimu da namuyep aisiya. Ye me unigiyawa, eme apa mae donki mataiwa me gerave bira da den dauwanewa murap gumbe tuya wakene ye yauya. Murap atan vesiya, sira aug mame oneya. <sup>3</sup> Da bira ye guniyap singui aib wapewa, ‘Ye divi oya mae donki mataiwa murap tuyawa vetene?’ me gumbe aib waya, ‘Ayapan imive wakene. Me sira baraupe koni kusi da mapa ompe.’ ”

<sup>4</sup> Mu amiya sira donki usiwa me ebu taibe ankwin gumbe murap tuya wakenewa yauya. Mu murap vete-mewa, <sup>5</sup> iyayapan upeba asimeve yokeyawa mu dirum waya, “Ye divi oya donki usiwa murap vetene?” <sup>6</sup> Mu Iesu dirumne mina garawa wayawa mu baina waya. <sup>7</sup> Mu donki usiwa Iesu gumbe aug uwaya. Mu wape geravewa mumawa donki gerave emeya, Iesu me gerave dauwag wakene. <sup>8</sup> Iyayapan obiren wape geravewa mumawa ebu taibe yayabeyaya, sira upeba mundana yoma naniwa kesiag ebu taibe yayabeyaya. <sup>9</sup> ☆Iyayapan namive yoig amomewa amave yoiemewa mu kwaruwaya, “Osanna! Apan me Ayapan iviwa gumbe uwapewa, me gumbe waribiya wakeigimpe!”

<sup>10</sup> “Mamunwa Devid kin arawa meuma me oniviwa, me gumbe waribiya wakeigimpe!  
Osanna at painauren danave!”

<sup>11</sup> Iesu Jerusarem aig temporu arawa unig aine. Me atan yang man yang dividivi undag yaune. Kum wait onanane, me aigowawa 12 gaibu dauwag Betani amiya.

## *Iesu Temporu Muinne*

---

☆ **11:9:** Sam 118:25-26

<sup>12</sup> Wantene mu Betani kweemewa, Iesu iyagon adne. <sup>13</sup> ✧ Me painau yangurane inaru kwayawa gaibu yaune. Magawa da gaibu go onan me yautan aine. Inaru gumbé uwanewa, me yaune magawa onan, kwayawa mekut, kuiyawa inaru kumiwa onan. <sup>14</sup> Meve Iesu yoma gumbé wane, “Da bira matai ge magawa geuma den nape.” Me waiwiwa aigowawa anoya.

<sup>15</sup> Jerusarem uwaiviwa Iesu temporu arawa unigne, Iesu temporu arawa unignewa, iyayapan mu gwiruwaremewa ge garawa emewa amatog atatai imne dauwag amiya. Me teboró me anmaga biroriyag auemewa sira umuk gwiruwaremewa undag aug tobiyane. <sup>16</sup> Da bira bairinda gumbo den wane gwiruwaremewa muma tam temporu arawa danave unig dauwag ampe. <sup>17</sup> ✧ Sira me mu toyau mum wane, “Me da den tene? ‘Ne gwe neuma wape nun gweyawa iyayapan undag oya.’ Megara ye ayana me yuaore toaore igiyawa dagup muma mina ane.” Meib tene.

<sup>18</sup> ✧ Pirisi koukawa ge Gwangwan toewanewan igiyawa mame anoyawa mu amatog toatan oya ebu didimama aya. Kuiyawa mu Iesu gumbé a aya, natawa iyayapan undag me Iesu toewanewan meuma gumbé degadega eme.

<sup>19</sup> At augoi adnewa, mu gwetoimu kokawa yankweg dauwag amiya.

### *Yoma Inaru Toyaine*

<sup>20</sup> Mumbevit mu yoma inaru megiyave uwag amomewa, mu yauya yoma inaru taiwa gaibu undag toyaine. <sup>21</sup> Pita meve imug anone Iesu gumbé wane, “Rabai, Yawa! Yoma inaru me ge yawag wanawa me toyaine!”

<sup>22</sup> “God gumbé anotumat a,” Iesu garawa wane. <sup>23</sup> ✧ “Ne natawa diruitna. Bira da tui mame gumbé aib wapewa,

---

✧ **11:13:** Ruk 13:6    ✧ **11:17:** Ais 56:7; Jer 7:11    ✧ **11:18:** Mak 14:1

✧ **11:23:** Mat 17:20

'Aga, poeman danave aiga,' sira me nonemagawa apa anopipanum den ape me membo wanewa pawape anotumat apewa, me gumbé pawape. <sup>24</sup> ☆ Meoya ne ye diruitna. Divi da oya nun wayanawa, me ye wait auyana anotumat ayawa me yeumawa ape. <sup>25</sup> ☆ Ye wan yoig nun waigimiyawa, ye bira da gumbé anokukam ag a ayawa, kukaeba meuma anog yankweya. Meib aya ipewa Mamewa kwiminawuwa me mina ye kukaeba yeuma anog yankwepe." <sup>26</sup> (-)\*

*Isu Yusiwa Meuma Oya Singui Waya*

<sup>27</sup> Mu sira Jerusarem uwaya. Iesu tempору arawa danave yoig gigiviwa, pirisi kouwawa, Gwangwan toewanewan igiyawa sira namuyoioyi igiyawa me gumbé uwaya. <sup>28</sup> Mu singui waya, "Ge dividivi mame egewa divi yusiwa gumbé ege? Sira yutugwa mame bira genne?"

<sup>29</sup> Iesu garawa wane, "Ne singui desirom yentna. Ye garawa didnegiya, ne matai ye diruitna ne divi yusiwa gumbé dividivi mame eni. <sup>30</sup> Jon babataito meumawa me kwimin apa onne go iyayapan gumbó onne? Ne didnegiya!"

<sup>31</sup> Mu mumbovit gae wageyau aya, sira waya, "Nu aib wata ipewa, 'Kwimin apa onne,' me matai wape, 'Divi oya ye anotumat me gumbé den ayana?' <sup>32</sup> Sira nu aib wata ipewa, 'Iyayapan gumbó onne'..." (Mu iyayapan gumbó a aya, kuiyawa iyayapan undag yumnasiya Jon me propeta da.)

---

☆ 11:24: Mat 7:7    ☆ 11:25: Mat 6:14-15    \* 11:26: Watavit ampa namu tenewa upeba V26 apa mameib waivi, "Megara ye iyayapan upeba kukaeba mumawa den anog yankweyawa, Mamewa kwiminawuwa me mina kukaeba yeumawa den anog yankwepe."

<sup>33</sup> Meoya mu Iesu gumbe garawa waya, “Nu den yaug anotu,” Iesu wane, “Ne mina ye den diruitna yutunwa divi gumbe ne mame eni.”

## 12

### *Nau Igiyawa Maibeyawa*

<sup>1</sup> ✨ Iesu maibe gumbe amatog wag dirumne. “Apan da greip\* nau meuma vedne. Me si birorot panne, sira wain gotosatanwa oya dukup sine, sira wakeg amaraigimtan gweyawa sine. Meve nau wareme igiyawa mu amaraigimpe me membo at da aine. <sup>2</sup> Maura kumiwa uwane. Me nau meuma aiviwa baraune nau amareme igiyawa gumbo greip nauwawa danave greip kwerawa botan oya aine. <sup>3</sup> Megara mu nau meuma aiviwa yum tug tog naniwa ingui barauya aine. <sup>4</sup> Meve me nau abnawa meuma da munan baraune aine. Mu me kuiyave tog ano ubmameba me gumbe aya. <sup>5</sup> Me ande da sira baraune aine, sira mu me toenguriya boine. Sira me upeba obiren tene amiya. Upeba mu guriya, upeba guriya boriruwaya.

<sup>6</sup> Me desirom me baraupe aipewa wakene, me usiwa me nonemagawa. Me oieba baraune aine, wane, ‘Mu ne utunwa ebnotu wampe.’

<sup>7</sup> Megara nau igiyawa garawano aya, ‘Mame me kwan autanwa abnawa. Oneya me tota boipe, meve me dividivi meuma numawa ape.’ <sup>8</sup> ✨ Meoya mu auwag toya boine, sira me greip nau meuma daieve aoreya.

<sup>9</sup> Meve greip nauwawa kuiya mamawa membo me dimbae ape? Me taig ompe nau igiyawa mu gutpe sira greip nau meuma iyayapan upeba mumppe. <sup>10</sup> ✨ Ye gae mame Baiboru danavewa den yaug basiene?

---

✨ 12:1: Ais 5:1-2 \* 12:1: Greip magawa gumbe wain wareme.

✨ 12:8: lbr 13:12 ✨ 12:10: Sam 118:22-23



'An me gwe sisi igiyawa topayayawa me an natawa kokawa me visidonawa apa teyawa mina ane.

<sup>11</sup> Mame Ayapan ane, nu yangunup yautunewa me oraimina me da den kukaine.’”

<sup>12</sup> Meve mu Iesu aug totan oya ebu diuya, kuiyawa me maibe gumbe munan dirumnewa mu anoya. Megara mu iyayapan undag munan a aya. Meve mu Iesu yankweg amiya.

*Siisa† Gumbe Takesi Tetanwa*

<sup>13</sup> ☆ Ivi mu Parisi igiyawa ge Erod igiyawa upeba Iesu oya teya amiya, Iesu gae meumawa gumbe yumtan oya.

<sup>14</sup> Mu Iesu gumbe onamiyawa, waya, “Toewanewan, nu yaug anotu ge apan natawa. Sira iyayapan oma den ane ge augempe. Kuiyawa ge mu den yawam anoana mu bira, ge natawa gumbe God ebuwawa toyaumunege. Siisa gumbe takesi garawa apewa me oraimina go onan? <sup>15</sup> Nu garawa ata go nu garawa den ata?” Megara ugauga mumawa Iesu yaug anone, me singui munne, “Ye divi oya ne aunegatan oya ageyau ene? Denari‡ aug oneya yautna.” <sup>16</sup> Mu anmagawa aug onamiya sira me singui munne, “Mame bira guwawa? Sira bira tenewa?” “Siisa meuma,” mu garawa waya.

<sup>17</sup> ☆ Meve Iesu mu gumbo wane, “Siisa meumawa Siisa waniya, sira God meumawa God waniya.” Mu me gumbe teraya.

*Sira Inaig Yoinewa Ge Memgebip*

<sup>18</sup> ☆ Meve Sadusi igiyawa mu veme bo gumbe sira den inaipe. Mu Iesu gumbe uwag singui waya,

---

† 12:12: Me Romu ayapaneba. ☆ 12:13: Ruk 11:53-54 ‡ 12:15:

Apan da oiyat desirom nau apewa, denari desirom aupe. ☆ 12:17: Rom

13:7 ☆ 12:18: Apa 23:8

19 ✨“Toewanewan, Mosisi nunan tene, ‘Apan tatawa botopewa sira kwapuraeba yankwenewa ud onanwa, me gwaneba kwapuraeba autanit di sira tatawa oya ud tepe.’  
 20 Gare tatawaiwa undag 7 wakeya. Tatawa namuwa vesin aug me boane, ud onan. 21 Duwameba kwapura aune megara me mina boane, ud onan. Duwamdesiyawa mina meib. 22 Mamaib onamiyawa, apan 7 ud onan. Oieba, vesin gaibu botone. 23 Sira mu yoipewa kumiwa apa, vesin me undag 7 danave bira biviwa ape, kuiyawa mu undag vesin me auya?”

24 Iesu garawa wane, “Ye gwambe yaug anoyana, kuiyawa ye Baiboru ge God yusiwa den yaug anoyana.  
 25 Wanampa boriruwawaya yoig wanekpewa, apan vesin den aupe, sira vesin apan den aupe, kwimin danave mu matai aneya mina wakepe. 26 ✨Boriruwawaya yoig wanektan oya, Mosisi buka meuma danave, mundana apa God me Mosisi gumbe anin wanewa ye den basiyayana? ‘Ne Eburaam God meuma, Aisak God meuma sira Jakob God meuma.’ 27 Me bo igiyawa God muma onan, megara me kaninga wakeemewa God muma. Ye gwambe di ene!”

### *Gwangwan Kokavitwa*

28 ✨Gwangwan toewanewan desirom da uwane. Me Iesu gae garawa eme anone yaug anone Iesu garawa oraimina munne, me wag dine, “Gwangwan undag danave natawa kokavitwa me ambuwa?”

29 ✨Iesu garawa wane, “Kokavitwa me mame: ‘Isuraeru anoya. Ayapan God numa me Ayapan desiromiren.  
 30 Nonegmagawa undag gaibu, guwawa geuma undag gaibu, imugwa undag gaibu, yutugwa undag gaibu, Ayapan God geuma gumbe baigan a.’ 31 ✨Duwameba me

---

✨ 12:19: Deu 25:5 ✨ 12:26: Eks 3:2,6 ✨ 12:28: Ruk 10:25-28

✨ 12:29: Deu 6:4-5 ✨ 12:31: Rvt 19:18

mame. ‘Ge iyayapan baigan munigima ge gembo baigan niege mina.’ Gwangwan kokavitwa mame minawa da den wakene.”

<sup>32</sup> Apan me garawa wane, “Ge baina wana, toewanewan. ‘God desiromiren sira da ube onan, me mekut. <sup>33</sup> ☆ ‘Nonegmagawa undag gaibu, anoano geuma undag gaibu, yutugwa undag gaibu, me gumbe baigan a’, sira ‘Ge iyayapan baigan munigima ge gembo baigan niege mina,’ Mame oraiminavitwa. Mae puyo okeremewa ge nakwai teemewa me mina onan.”

<sup>34</sup> Iesu yaunewa me garawa oraivit wane, me gumbe wane, “Ge God toimuwawa apa arama den wakeyana.” Kum me ivi, bira da Iesu gumbe singui da watan den anone.

#### *Keriso Me Bira Usiwa*

<sup>35</sup> Iesu temporu arawa apa toyau muniviwa me singui munne, “Aninin Gwangwan toewanewan igiyawa veme Keriso me Devid usiwa? <sup>36</sup> ☆ Devid membo waivi Guwawa iyakaisiyapama gumbe taibe wane:

‘Ayapan me Ayapan neuma gumbe wane:

“Nanin yutanwa apa wakeigima, ivi anavi geuma amagwa ankwatave ne tetna.” ’

<sup>37</sup> Devid membo Keriso gumbe Ayapan wane, aninin Keriso me Devid usiven ape?” Iyayapan obiren me gumbe degadegaepam anoeme.

<sup>38</sup> Iesu toyau muniviwa me wane, “Gwangwan toewanewan igiyawa oya yaukape. Mu imuwo wape yobutaren oraivitwa enam gwiruwaremewa arawa apa birorot gigimpe iyayapan engaun mumpe. <sup>39</sup> Sira mu imuwo sinagogu danave seya painauwa waketan anoeme sira buyunai nemewa at painauwa apa waketan anoeme. <sup>40</sup> Mu kwapura gweyowa apa iyab muneme, sira iyayapan

---

☆ 12:33: 1Sm 15:22; Ose 6:6    ☆ 12:36: Sam 110:1

yawamtan oya nun yobenut veme. Iyayapan meiba mu matai ibnapamit nau mumpé.”

*Kwapura Puyo Meuma*

<sup>41</sup> Iesu puyo barauemewa arawa gambena apa yan wakene, iyayapan anmaga temporu puyo teemewa danave teeme yaune. Tawara igiyawa obiren anmaga koka teeme.

<sup>42</sup> Megara kwapura gwandakwaeba uwane me anmaga kopa kusiwa reputa<sup>§</sup> duwam tene. Anmaga reputa duwam garawa me anmaga kodorant desirom.

<sup>43</sup> ✧ Iesu aigo meuma auwane mu onamiya. Me wane, “Ne ye natawa diruitna. Kwapura gwandakwaeba mame me puyo teemewa danave puyo obiren tene, iyayapan upeba undag mina onan. <sup>44</sup> Mu tawara egave em yoiya. Megara kwapura mame me undag me gumbe wakeg aigimtanwa meme tene.”

## 13

*Kum Oieba Irakoniwa*

<sup>1</sup> Iesu me temporu arawa yankweg dauwag aitan aiviwa, aigo meuma desirom da me gumbe wane, “Yawa, toewanewan! An kouka! Gwe oraimina!”

<sup>2</sup> ✧ “Ge gwe kouka undag mame yavege?” Iesu garawa wane, “An desirom da mapa dawa egave den wakepe; an undag gwiriruwag aikpe.”

<sup>3</sup> Temporu gambena apa, Iesu tui Orivu kuiyave wakewewa, Pita, Jemus, Jon ge Andru mukuren me gumbe singui waya, <sup>4</sup> “Didnuna, kum divi dividivi mame pawape? Sira undag mame pawatan aigimpewa irakoniwa aninin?”

<sup>5</sup> Iesu mu gumbo amatog wane, “Yaukape iyayapan da ye den uga yempe. <sup>6</sup> Obiren ne ivunwa gumbe uwape,

---

§ 12:42: 128 reputa me 1 denari. Apan oiyat desirom nau apewa 1 denari aupe. ✧ 12:43: 2Ko 8:12 ✧ 13:2: Ruk 19:44

waigimpe, 'Ne me,' sira obiren ugai mumpe. <sup>7</sup> Wanampa mut gaiyawa ge kigemuk mut oya anoyawa, me den teraya. Dividivi meiba pawatanit di, go oieba oya me matai uwape. <sup>8</sup> At sinsin igiyawa mu at sinsin igiyawa dawa gaibu matai yoig mut watpe, sira at kokawa me at kokawa dawa gaibu matai yoig mut watpe. At upeba gumbe matai iyagon ge pinunu ape, sira iyagon kumiwa uwape. Undak mame ud yaitan dawaiba amatoiviwa mina.

<sup>9</sup> ✧Ye yembovit amaraya. Iyayapan ye tam teempe dai-boru yemboa nanuwo, sira sinagogu danave gurepe. Sira ne nau neumawa oya ye amareme igiyawage kin yeuma mu namuwo yoiya. Me dividivi undag ye yauyanawa mu dirumtan oya. <sup>10</sup> Gae oraiwa namuiaren dig gwetoimu undag gumbo opata wape. <sup>11</sup> ✧Mu ye da tuepewa sira nanuwo te yempewa, namu gae anin watan oya den anoya. Kum me kumiwa apa toyau yempewa me di waya, kuiyawa ye den gae waya, Guwawa Iyakaisiyapama me wape.

<sup>12</sup> ✧Tatawa gwaneba anavi ag omin baraupe, da botope. Mamawa usiwa gumbe anavi ape botope; usitainawa mu mamuwa ge inowa gumbo gara kwaviyape, mu boriruwape. <sup>13</sup> ✧Kuiyawa me ivunwa oya, iyayapan undag ye diruipe watkukam yempe, go bira da oiyeba konive yusiyusi ag yoigimpewa matai waita wampe.

<sup>14</sup> ✧Wanan ye yauya 'Topai abnawa me di wakukampewa' me yokeigimpe megara at meumawa onan — Basiemewa igiyawa yaug anoya—iyayapan mu Judia apa wakeyawa mu tui gumbe a ampe. <sup>15</sup> ✧Bira da me gweyawa gwanob gerave wakenewa den kweg aikpe, sira divi da

---

✧ **13:9:** Mat 10:17-20    ✧ **13:11:** Ruk 12:11-12    ✧ **13:12:** Mat 10:21    ✧ **13:13:** Mat 10:22; Jon 15:21    ✧ **13:14:** Dan 9:27; 11:31; 12:11  
 ✧ **13:15:** Ruk 17:31

autan oya gwe den unikpe. <sup>16</sup> Bira da nau danave wake-newa wape autan oya den sira taig ompe. <sup>17</sup> ☆ Me kumiwa di kukaipe, vesin bug ayawa gumbo, sira inanaiwa ud am munemewa gumbo. <sup>18</sup> Meoya ye nun waya mame taigipam kumiwa danave den pawape. <sup>19</sup> ☆ Kuyawa me danadawai kokavitwa kumiwa. Me God at piyu wadne kumiwa apa onne gare mame, me den pawane sira me matai den pawape. <sup>20</sup> Ayapan me kumiwa den kwagomiyape pipi apewa, iyayapan desirom da den vinigimpe. Megara wak tamne igiyawa oya, Ayapan me kumiwa kwagomiyane pipi ane. <sup>21</sup> Me kumiwa apa, iyayapan da guniyap wapewa, ‘Yauya, Keriso mame!’ go ‘Yauya, me asime!’ megara den anotumat aya. <sup>22</sup> ☆ Keriso ugaugaeba sira propeta ugaugaeba mu matai uwape, sira mu guwaguwawa ge irayauyau ape, sira me oma apewa mu wak tamne igiyawa gumbo matai uga yempe. <sup>23</sup> Meoya yembovit amaraya. Ne dividivi undag kum namiven wait ye diruina.

<sup>24</sup> ☆ Megara danadawai kumiwa me amave atataivi,

‘Kum matai sisip uwag ompe,

sira dud den esipe; sira kwimin yusiwa ipunapun ape.

<sup>25</sup> marantun kwimin gumbe aikpe,

Sira kwimin yusiwa meuma ipunapun ape.’

<sup>26</sup> ☆ Me kumive, iyayapan mu Apan Usiwa\* me irikup danave yusiwa ge eyawa koka gaibu uwaigimpe yaupe.

<sup>27</sup> ☆ Sira Apan Usiwa me aneya meuma tepe ompe, kwimin piyu gina gampenwa yunadnewa aig gampenwa uwanewa, at ginawa duwam ge duwam gumbe, iyayapan gomiya munnewa matai agoniyape.

---

☆ **13:17:** Ruk 23:29    ☆ **13:19:** Dan 12:1; Rev 7:14    ☆ **13:22:** Rev 13:13    ☆ **13:24:** Ais 13:10; Joe 2:10,31; 3:15; Rev 6:12-13    ☆ **13:26:** Rev 1:7    \* **13:26:** Me Iesu Keriso.    ☆ **13:27:** Mat 13:41

<sup>28</sup> Gare yoma inaru gumbé maibe mame yaug anoya. Yoma begawa duwaipe sira kwayawa taibe apewa, tate ye yaug anoya me kum kumiwa me koni aivi. <sup>29</sup> Ebu me desiroma, ye me dividivi mame undag yauyawa, Apan Usiwa me ankwin noive koni aivi yaug anoya. <sup>30</sup> Ne natawa diruitna, namu dividivi undag mame veniyape, ivi matai kum garewa uwag aipe. <sup>31</sup> Kwimin ge piyu mame onanape, megara gae neumawa den onanape.”

*Mamunwa God Me Mekut Kum Yaug Anone*

<sup>32</sup> Oiyat me, nib koniwa da bira den yaug anone. Aneya kwiminuwa ge Usiwa mu mina den yaug anoya. Megara Maman mekut yaug anone. <sup>33</sup> Amat yembovit aya! Yangewa mereruwape yangut aigimiya! Ye den yaug anoyana kum divi me uwape. <sup>34</sup> Me gwe mamawa ampa aivinewa mina. Me gwe meuma yankweg nau meumawa amaratanwa igiyawa kuiyave kuiyave tepe amara, desirom desirom nau meumawa anin tenewa ape, sira ankwin noive amaraivi abnawa dipe yangut aigimpe.

<sup>35</sup> ☆ Meoya yangut ande aigimiya, kuiyawa ye den yaug anoyana kum divi gwe mamawa taig uwape—anten au-goiyau go aram nub bagiwa apa go kokorek waigimpe gumbé go wantete apa go. <sup>36</sup> Me ui onan da uwapewa, me den kubvinigimiya yawaipe. <sup>37</sup> Ne ye guniyap veniwa ne meib iyayapan undag gumbo veni, ‘Yangewa mereruwape kaipat aigimiya!’”

## 14

*Vesin Da Iesu Kuiyave Oira Egamne*

<sup>1</sup> Gare Uwag Gaveya Buyunaeba ge Bredi Iisut Onanwa Buyunaeba oya oiyat duwam wakeya. Pirisi koukawa ge Gwangwan toewanewan igiyawa mu aninin ake Iesu aug

totanwa oya gaiyawa dima yuya. <sup>2</sup> Mu waya, “Buyunai danave oraimina onan, kuiyawa iyayapan mut yoipetan.”

<sup>3</sup> ✧ Iesume at Betani apa apan Saimon gweyave wakene. Me yuwat warumne iviwa reprosi aunewa. Me teboru apa wakenewa, vesin da uwane. Arabasta ap\* me danave Narudo oira tayapama me garawa kokawa wakenewa, me aug uwane. Me ap warensine oira tayapama Iesu kuiyave egamne.

<sup>4</sup> Iyayapan upeba asimeve wakeyawa mut igamne gae garawa aya, “Me divi oya oira tayapama beregam aivi? <sup>5</sup> Me gwiruwatponowa me garawa 300 denari sira egave aupono. Sira anmaga me gwandokuwaeba igiyawa mumpono.” Mu gae gera gerave me gumbewa ge wa aya.

<sup>6</sup> Megara Iesu wane, “Yankweya me anoiviwa ape. Divi oya ye me pui yuene? Me ne gunap oraimina di ane. <sup>7</sup> ✧ Gwandokuwaeba igiyawa mu kum evedni ye gaibu wakeya. Sira ye oma ape mu waita muniya kum da ye imuyep apewa. Megara ne guniyap evedni den wakeeni.

<sup>8</sup> ✧ Vesin mame oma ane anewa ane. Me oira tayapama kwapunwa egamnawa me bo neuma oya namiven tamibarip ane. <sup>9</sup> Ne natawa diruieni. Piyu mame danave at ampa ampa undag gae oraiwa mame opata wapewa, vesin mame anewa gaibu dirumpe me imug anope.”

<sup>10</sup> Meve Judas Isukariot, aigowawa 12 danowo desirom da, me Iesu ominawa tetan oya pirisi koukawa munan aine. <sup>11</sup> Mu mame anoyawa degadega aya. Mu anmaga wantan oya agi waya. Meoya Judas me Iesu nanuwo barautan oya ebu da oraiwa diune.

### *Ayapan Augoi Nakwaeba*

---

✧ 14:3: Ruk 7:37-38      \* 14:3: Ap an uiwa muinne gumbewa wariyawa

✧ 14:7: Deu 15:11      ✧ 14:8: Jon 19:40



<sup>12</sup> ✨ Iist Onanwa Bredi Buyunaeba kum namuirenwa, me Uwag Gaveya sip usiwa toin guttan kumiwa, Iesu aigowawa me gumbe singui waya, “Ampa ge imugap Uwag Gaveya Buyunaeba nakwai meuma ge natan oya nu ampa anke tamibarip ata?”

<sup>13</sup> Meoya me aigowawa duwam tene amiya, sira dirum wane, “Gwetoimu kokawa danave aisiya. Me apa apan da me yoi irutawa aug aivinewa me ye yauyempe, me amave aisiya. <sup>14</sup> Gwe danave unig amiyawa, gwe abnawa gumbe waya, ‘Toewanewan didnunne. Ne amdau pantut neuma ampa? Me danave ne Uwag Gaveya Buyunaeba aigo neuma gaibu nata.’ <sup>15</sup> Pantut kokawa painauwa me toyau yempe yauya teboru ge seya dividivi wait tamibarip ane. Me apa nunan tamibarip aya.”

<sup>16</sup> Me aigowawa dauwag amiya. At kokawa danave unigiyawa mu yauya dividivi wait Iesu mu gumbo wanewa mina. Meve mu Uwag Gaveya Buyunaeba oya tamibarip aya.

<sup>17</sup> At augoi uwag onnewa, Iesu aigowawa 12 gaibu asime uwaya. <sup>18</sup> ✨ Mu teboru apa wakek nakwai nemewa, Iesu wane, “Ne natawa diruitna. Ye da ne omin neuma barautan aivi—ud me gare ne gaibu nakwai netewa da.”

<sup>19</sup> Mu danadawai auya desirom desirom me gumbe waya, “Natawa di me ne onan?”

<sup>20</sup> Iesu garawa mu gumbo wane, “Me aigo neuma 12 danowo desirom da. Me ne gaibu bredi kabum danave puwamnewa. <sup>21</sup> Baiboru gumbe nenan tenewa mina Apan Usiwa me matai kweg aipe. Apan Usiwa gumbe omin meuma tepewa me gumbe ano kukaeba wakeigimpe! Me den yaipawa me menan oya oraimina.”

<sup>22</sup> Mu nakwai nemewa Iesu bredi aune, engaun wanne sira wapeyam aigo meuma munne. Me wane, “Auya, mame ne kwapunwa.”

<sup>23</sup> Meve me ap aune, engaun wanne, sira aigo meuma munne me gumbe mu undag naya.

<sup>24</sup> ☆ Iesu mu gumbo wane, “Mame ne ganigani neuma agi wanawa, ganigani areriyag aikpe iyayapan obiren munan. <sup>25</sup> Ne ye natawa diruitna. Ne yoma greip magawa yoiba sira den natna. Ne waketna God toimuwawa danave meve mataiwa natna.”

<sup>26</sup> Mu waiyawaiya bererinawa toya onananewa, mu dauwag tui Orivu oya amiya.

### *Iesu Yaug Anone Pita Uyai Wape*

<sup>27</sup> ☆ Iesu mu gumbo wane, “Ye undag matai uyug aigiya. Kuyawa me wait tenewa di: ‘Mae sip amaraivi abnawa ne totnawa sip mu marewampe.’

<sup>28</sup> ☆ Megara ne sira wan yoitnawa, ivi ne matai namuiban at Gariri anekna.”

<sup>29</sup> Pita taibe wane, “Anten undag matai uyug aikpe mina, go ne onan.”

<sup>30</sup> Iesu garawa wane, “Ne natawa diruktna. Kum garewa,—aram garewa—, namu ge koniwa duwamdesi wa me ne den yaug anonega, ivi kokorek koniwa duwameba wape.”

<sup>31</sup> ☆ Megara Pita noiwa yusipamit wane, “Anten ne ge gaibu bo ata go, megara ne den di watna, ‘Ne den yaug anogemna.’” Sira aigowawa upeba undag gae desiroma waya.

### *Gessemani*

---

☆ **14:24:** Eks 24:8; Jer 31:31-34; Jak 9:11; 1Ko 10:16; Ibr 9:20 ☆ **14:27:**  
 Jak 13:7 ☆ **14:28:** Mat 28:16; Mak 16:7 ☆ **14:31:** Jon 11:16

<sup>32</sup> ☆ Mu at iviwa Gessemani oya amiya. Aigo meuma gumbo Iesu wane, “Ne nun waigimpnawa ye mapa wakeya.” <sup>33</sup> Me Pita, Jemus ge Jon tam gaibu amiya. Me amatog danadawai kokavit aune. <sup>34</sup> ☆ Me gumbo wane, “Danadawai kokavit auna guwanwa bo yumatawa apa avivi. Mame apa wakeg yangewa mereruwape.”

<sup>35</sup> Kusi utan aig petat piyu egave aigne nun wane, “Me oma ape ipewa kum mame ne gunap uwag gaveyag aipe.”

<sup>36</sup> ☆ Me sira wane, “Abba† Maman, ge gungap dividivi undag oma ane. Ne gunap ap mame atan auwa. Megara ne anoeniwa onan, anoegewa a.”

<sup>37</sup> Meve aigo meumawa Iesu sira taig onne. Me yawamnawa mu kubvineme. Me Pita gumbe wane, “Saimon, ge kubvinege? Ge kum desirom mina oma den ane yangut aigima? <sup>38</sup> Yangagwa mereruwape kaipat aigima sira nun waigima. Amaorot danave den uyug aiga. Guwagwa imive aivi, go kwapugwa yusiwa onan.”

<sup>39</sup> Iesu me sira taig aig gae desiroma gumbe nun wane.

<sup>40</sup> Me sira taig onnawa, me yawamne mu sira ande kubvineme. Kuyawa yangowa ibnawaya. Mu den yaug anoya anin Iesu gumbo wape.

<sup>41</sup> Koni duwamdesiyawa Iesu sira taig uwane mu gumbo wane, “Ye kub ande vinene, nonewa emene? Minambe! Kum uwane. Yauya, Apan Usiwa kukaeba igiyawa nanuwo omin meuma baraupe. <sup>42</sup> Wan yoiya! Anta! Mame ne omin neuma tenewa abnawa uwane!”

### *Iesu Yumiya*

<sup>43</sup> Iesu me gae waivinewa, Judas me aigowawa 12 danowo desirom da uwane. Me gaibu iyayapan obiren deba ge gadiga tam uwaya. PIRISI KOUKAWA, Gwangwan

---

☆ 14:32: Jon 18:1    ☆ 14:34: Jon 12:27    ☆ 14:36: Mak 10:38; Jon 6:38

† 14:36: Natawa me Maman.

toewanewan igiyawa sira namuyoiyoi igiyawa mu teya onamiya.

<sup>44</sup> Gare omin baraunewa abnawa mu gaibu ebu wariya. “Apan me ne uwa totnawa me me. Me yum yusiwa veyag aug aisiya.” <sup>45</sup> Judas tatevit Iesu gumbe uwag wane, “Rabai!”<sup>‡</sup> sira me uwatone. <sup>46</sup> Iyayapan Iesu yum auya. <sup>47</sup> Me apa Iesu gumbe yokeemewa danowo desirom da me deba meuma arobne pirisi painauvitwa nau meuma wariviwa da viyag naunawa kwagomiyane aigne.

<sup>48</sup> Iesu wane, “Ne ub igiyawa tam namuyoiyoi eni go? Meoya ye deba ge seri gumbe ne yumnektan uwayana?” <sup>49</sup> ☆ Kum evedni ne ye gaibu, sira temporu arawa danave ye toyau emeni, megara ye den ne yum negiyana. Megara Baiboru gaiyawa me di veniyape.” <sup>50</sup> ☆ Meve iyayapan undag Iesu yankweyeg a amiya.

<sup>51</sup> Apan mataiwa me taibe, wape rinen egavewa mekut enne. Me Iesu amave aivinewa mu me yumtan eme. <sup>52</sup> Me wape meuma yankweg taibe kintog a aine.

### *Daiboru Painauvitwa Namive*

<sup>53</sup> Mu Iesu pirisi painauvitwa gumbe aug amiya. Pirisi koukawa ge namuyoiyoi igiyawa ge Gwangwan toewanewan igiyawa undag uwag agoniyaya. <sup>54</sup> Pita kusi isinutiren me amave aig pirisi painauvitwa gwe arawa unigne. Me apa gwe amaremewa gaibu yan wakeg iyam veraivi.

<sup>55</sup> Pirisi koukawa ge Daiboru Painauvitwa igiyawa undag Iesu tope boatan oya gae umum natawa didimama eme. Megara mu natawa da den yauya. <sup>56</sup> Iyayapan obiren me gumbe ugauga waya, megara umum muma wayawa me den yunadne.

---

<sup>‡</sup> **14:45:** Natawa me toewanewan. ☆ **14:49:** Ruk 19:47; 21:37; Jon 18:20

☆ **14:50:** Sam 31:11

<sup>57</sup> Meve iyayapan upeba wan yoike ugauga umumawa mame me gumbe waya: <sup>58</sup> ✧ “Nu anotu me wane, ‘Ne temporu mame me iyayapan siyawa wakukampna, sira kum duwamdesi danave dawa me iyayapan nanuwo den sipewa ne sitna.’” <sup>59</sup> Megara me apa umum mumawa den yunadne.

<sup>60</sup> Meve pirisi painauvitwa iyayapan yapowo wan yoine Iesu gumbe singui wane, “Ge garawa wa go onan? Iyayapan mame umum kukaeba gungap vemewa ge anin anoenge?” <sup>61</sup> Megara Iesu ande iyaigidne garawa den wane. Pirisi painauvitwa me gumbe singui sira wane, “Ge Keriso, Waribiyane Usiwa?”

<sup>62</sup> Iesu garawa wane, “Ne me. Ye matai yauya Apan Usiwa me Yusipama naniyutanwa apa wakeigimpe, sira guwaveru kwiminawu egave wakeg uwaigimpe yauya.”

<sup>63</sup> Pirisi painauvitwa wape meumawa warimine. Me wane, “Divi oya nu yauyawa da tamta? <sup>64</sup> ✧ Ye God gumbe iyagau mina anoene. Ye anin anoene?” Mu undag me gumbe anog waya me boitanit di. <sup>65</sup> Meve iyayapan upeba amatog gwitup me gumbe emiya. Mu me yangawa tuboriya nanuwa gumbe toya, sira waya, “Ge wa, bira toagivi!” Sira gwe amaremewa me aug toya.

### *Pita Iesu Gumbe Uyai Wane*

<sup>66</sup> Pita me gwe visive painau wakenewa vesin otau me pirisi painauvitwa nauwawa aiviwa da megiyave uwane.

<sup>67</sup> Me yaune Pita iyam iraivi, sira me gumbenut yangut yaune, wane, “Ge mina Nasaret apan Iesu gaibu gigena.”

<sup>68</sup> Megara me uyai wag wane, “Ne den yaug anona ge divi oya vege.” Me ankwin noiwa gumbe aine.

<sup>69</sup> Meve vesin otau nauwawa aiviwa me Pita yaune, iyayapan birorot yokeyawa gumbo me sira amatog wane,

“Apan mame mu dawa.” <sup>70</sup> Me sira uyai wane. Pungi den wane, iyayapan birorot yokeyawa sira Pita gumbe waya, “Natawa di, ge mu desiroma da, kuiyawa ge Gariri apan.”

<sup>71</sup> Me amatog aewag wane. Me gae natawa di mu gumbo wane, “Apan mame ye menan venewa ne den yaug anona.”

<sup>72</sup> Tatevit kumkum duwameba wane. Meve Pita me watavit Iesu gae wanewa imug anone, “Namu koni duwamdesi ge ne topai negawa, ivi kumkum koni duwam wape.” Sira me petat tog iruwane.

## 15

### *Iesu Pairat Namive Yoine*

<sup>1</sup> ☆ Mumbevit pirisi koukawa, namu yoiyoi igiyawa, Gwangwan toewanewan igiyawa, ge Daiboru Painauvitwa igiyawa undag gaibu dima yuya. Mu Iesu tug dauwag amiya. Pairat nanive me barauya.

<sup>2</sup> Pairat Iesu gumbe singui wane, “Ge Ju igiyawa kin mumawa?” Iesu garawa wane, “E, meme vege.”

<sup>3</sup> Pirisi koukawa Iesu gumbe dividivi undag pui yusi-pamit yuya. <sup>4</sup> Sira Pairat me singui wane, “Ge gae garawa da den wa? Yawa, mu ge gungap dividivi undag pui yuwageme.”

<sup>5</sup> ☆ Ande Iesu gae garawa da den wanewa, Pairat terane.

<sup>6</sup> Gare, buyunai kokawa kumive, kansoru kokawa anoanowawa wakene. Nog aegiya iyayapan wag desirom ingui arob baraupe dauwag aipe. <sup>7</sup> Apan da iviwa Barabas nog dana wakene. Iyayapan mut igamivi mut ag guriya boriruwaya. Me mu gaibu nog danave wakeya. <sup>8</sup> Aninin bairawan evedni Pairat munan aivi mina atan oya, iyayapan obiren Pairat gumbe uwag amatog dig waya.

<sup>9</sup> Pairat garawa wane, “Ye anoene ne Ju igiyawa kin muma yenan kwetna dauwag aipe?” <sup>10</sup> Kuiyawa me yaug

anone pirisi koukawa mu gunarepam eme oya Iesu aug waniya. <sup>11</sup> ✧ Megara pirisi koukawa mu iyayapan obiren Pairat dipe mu imuwo Barabas kwepe dauwag aipe.

<sup>12</sup> Meoya, Pairat sira dirum wane, “Ne apan mu vemewa Keriso oya aninin aten?”

<sup>13</sup> Mu kwaruwaya, “Korosi gumbe toya!”

<sup>14</sup> Megara Pairat wane, “Divi oya? Kukaeba meuma divi ane?” Megara mu nouwa au ge kwaruwag waya, “Korosi gumbe toya!”

<sup>15</sup> Pairat imive iyayapan obiren degadega ape. Sira me Barabas me arobne dauwag aine. Me Iesu murap yaigipama gumbe toya, sira korosi gumbe totan oya mu nanuwo baraune.

#### *Mut Igiyawa Iesu Gumbe Iyagau Okeriya*

<sup>16</sup> Mut igiyawa Iesu auwag kokawa gweyawa danave unig amiya. Gwe me Romu kokawa muma baraune onne amarag viniviwa. Sira mut igiyawa undag agoniyanan auwaya. <sup>17</sup> Mu me gumbe wape yobutaren en waniya, —wape gamateba me pundirit ge diyapam yapavewa, —meve mu murap ipuni ganaganapam aug ikoki ag kuiyave tonasiya. <sup>18</sup> Meve mu amatog menan auwaya, “Kaiwa kaiwa! Ju igiyawa kin mumawa!” <sup>19</sup> Sira mu tutu gumbe me kuiyave toya, gwitup me gumbe emiya, koniwo yug me gumbe petat aya. <sup>20</sup> Mu Iesu gumbe iyagau wag, wape asime atan aropeg wape meuma yobutatae aug enwaniya, wape gamateba me pundirit ge diyapam yapavewa. Meve me auwag taibe dauwaya yoma korosi gumbe tope boitan oya.

#### *Iesu Korosi Gumbe Toya*

<sup>21</sup> ✧ Saimon me at Sairin apan, Rupas ge Arekisanda mamowa. At meuma apa uwag onnewa. Me korosi

oieve autan oya ayag waya aune. <sup>22</sup> Mu Iesu auwag at iviwa Gorugosa uwaya. Me natawa at me Kuyamared-nawa. <sup>23</sup> Meve mu wain me gegura iviwa maaru gaibu biroriyayawa waniya, go me den nane. <sup>24</sup> ✧ Meve mu korosi egave toya. Mu wape meuma kepteya, biravit divi autan oya kae kusi aya.

<sup>25</sup> Mu korosi egave me toyawa me mumbé kum koniwa 9 apa. <sup>26</sup> Gigirum me kukaeba meuma teg yauyawa me aib tene: JU IGIYAWA KIN MUMAWA. <sup>27</sup> Mu ub igiyawa duwam korosi egave mu gaibu towamiya, da naniyutanwa, da naniketaiwa apa. <sup>28</sup> (-) <sup>29</sup> ✧ Iyayapan bira bira uwag amomewa gae kukaeba Iesu gumbe veme, kuyowa viyaviya eme, mu veme, “Ge wana, ‘A! Temporu toyayag sira kum duwamdesi danave sitna.’ Gembovit wag inaigita. <sup>30</sup> Korosi gumbe aig onaga gembo waita a!”

<sup>31</sup> Ebu desirom gumbe piri si koukawa ge Gwangwan toewanewan igiyawa mu gaibu Iesu gumbe yano waya. Mu waya, “Me iyapan upeba waita munne, go me oma den ane membo ingan waita wampe! <sup>32</sup> Keriso, Isuraeru kin mumawa, gare mame di korosi gumbe aig onaga. Nu yautave ge gungap anotumat ata.” Iyapan Iesu gaibu korosi egave towamiyawa mu mina gae kukaeba Iesu gumbe dig waya.

### *Iesu Boane*

<sup>33</sup> Kum kuyunup aune, at undag sisip uwag aine, augoi kum koniwa duwamdesi aune. <sup>34</sup> ✧ Kum duwamdesi aunewa Iesu noiwa kokavit wane, “Eroi Eroi rama sabakutani?”—Me natawa, “Maman maman, divi oya ne yankwenegana?”

<sup>35</sup> Iyayapan upeba megiyave yokeemewa anog waya, “Anoya! Me Eraija oya auwaivi.”

---

✧ **15:24:** Sam 22:18 ✧ **15:29:** Sam 22:7; 109:25; Mak 14:58 ✧ **15:34:** Sam 22:1



<sup>36</sup> ☆ Apan desirom kin tog, sponji\* danave wain sisipam em arob aug tutu ginave yune Iesu natan oya wanne, me wane, “Me yankweya wakepe. Nu yauta Eraija uwag me aug aikpe, go.”

<sup>37</sup> Iesu awau kokavit wanewa gaup meuma oieba tareyane.

<sup>38</sup> Temporu danave wape kokawa me geroriyayawa me kuiyawa apa dumed aig onke ginawa uwane duwam ane.

<sup>39</sup> Senturion† me Iesu namive yoinewa me awau wanewa anone, me aninin botone yaug wane, “Natawa di apan mame God Usiwa!”

<sup>40</sup> ☆ Vesin upeba painau apa yan greme. Mu danowo Magdara vesin Meri, Jemus kusikaren ge Josep inawa Meri ge Sarome wakeya. <sup>41</sup> At Gariri apa vesin mu Iesu amave onamiya sira amat meuma aya. Vesin obiren upeba me gaibu at Jerusarem uwayawa mu asimeve wakeya.

### *Iesu Dagup Danave Barauya*

<sup>42</sup> Augoi uwag onne. Kum me Tamibarip Kumiwa, sira me namiven umae Sabat Kumiwa. <sup>43</sup> At Arimataya apan Josep, me Daiboru Painauvitwa igiyawa yapowo kokawa. Me membo God toimuwawa uwatanwa oya amaraivi. Me ano meuma yusipamit ane Pairat gumbe uwag Iesu kwapiwa oya nun wane. <sup>44</sup> Pairat Iesu wait boanewa anog terane. Me senturion menan auwag singui wane Iesu wait boane go onan. <sup>45</sup> Me senturion gumbe natawa di wat kiniyanewa, Iesu kwapiwa Josep wanne. <sup>46</sup> Josep wape rinen gwiruwadne. Kwapiwa aug aignewa wape me gumbe panne. Sira dagup danave baraune. Dagup me an koka kwabnewa. Meve me an koka wak siririyane dagup

---

☆ 15:36: Sam 69:21 \* 15:36: Me wape tautau mina. † 15:39: Me mut igiyawa 100 amaraivi abnawa. ☆ 15:40: Ruk 8:2-3

ankwinawa tobodne. <sup>47</sup> Magdara vesin Meri ge Jose inawa Meri mu Iesu barauyawa arawa yangowo yauya.

## 16

### *Iesu Sira Inaig Yoine*

<sup>1</sup> Sabat Kumiwa onananewa, Magdara vesin Meri ge Jemus inawa Meri ge Sarome, mu Iesu kwapiwa oira barautan oya aroma\* gwiruwariya. <sup>2</sup> Pura danave kum namuirenwa mumbevit, kum di dauwaivi, dagup oya onamiya, <sup>3</sup> sira vesin mu gae singui garawa aya, “Bira da dagup ankwinawa apa an<sup>†</sup> itariyape watappe?”

<sup>4</sup> Megara mu yangut wan yauyawa, mu an koka me wait itariyane. <sup>5</sup> Mu dagup danave unigiyawa, mu apan mataiwa me wape yobutatae puipuyuwa enne yutanwa apa yan wakeivi yauya. Vesin a aya.

<sup>6</sup> Megara me wane, “A den aya. Ye Nasaret apan Iesu me korosi egave toyawa oya yobene? Me sira inaig yoine! Me mapa den wakene. Yauya me barauyawa arawa. <sup>7</sup> ☆Ye aisiya, aigo meuma ge Pita dirumiya, ‘Me namuiban Gariri aivi, me anin diruineawa mina, me apa ye me yauya.’ ”

<sup>8</sup> Vesin mu daramdaram sira pimpangit ag, dagup apa dauwag kintog amiya. Mu da bira divi da den diya, kuiyawa a aya.

*[Baiboru Namu Tenewa Obiren Danave Mak 16:9-20 Den Wakene.]*

<sup>9</sup> Pura amatonewa apa mumbevit Iesu sira inaig yoinewa, me Magdara vesin Meri gumbe namu uwane. Numan Iesu airapu kukaeba 7 vesin me gumbe atatai imne. <sup>10</sup> Iyayapan mu Iesu gaibu gigemewa danadawai

---

\* **16:1:** Me gegura tayawa oraiminawa. † **16:3:** Me an kokawa me dagup ankwin tobodne☆ **16:7:** Mat 26:32; Mak 14:28

auwag iruveme. Meri mu gumbo aig dirumne. <sup>11</sup> Mu anoya Iesu me inaine vesin me yaune, megara mu anotumat den aya.

<sup>12</sup> Ivi apan duwam mu at da oya amomewa, Iesu tobiyane gina ube mu gumbo uwane. <sup>13</sup> Mu duwam mame sira taigiya upeba gumbo umum waya, megara mu mina anotumat den aya.

<sup>14</sup> ☆ Ivi aigowawa 11 nakwai nemewa Iesu mu gumbo uwamunne. Me anotumat muma yan aigne sira nokakae aya oya me mu gumbo yamdapam wane. Kuiyawa Iesu sira inaig yoinewa iyayapan yauyawa mu iyayapan upeba gumbo umum wayawa mu anotumat den aya.

<sup>15</sup> ☆ Me mu dirumne, “Piyu undag gumbe dauwag aisiya. Sira gae oraiwa undag wat temunnewa gumbo dirumiya.

<sup>16</sup> ☆ Bira da anotumat ag babataito apewa me waita aupe. Megara bira da me anotumat den apewa me ibnawa aupe.

<sup>17</sup> ☆ Sira irairawa mame anotumat aya igiyawa gumbo. Ne ivunwa gumbe airapu kukaeba atatai impe; mu pednowa mataiwa gumbe gae wape; <sup>18</sup> ☆ mu mokare nanuwo gumbe wan aupe; mu yoi kukaeba nape, go mu gumbo da den di kukaibe; mu nanuwa yuwat igiyawa egowo tepe oraimina ape.” <sup>19</sup> ☆ Ayapan Iesu mu gumbo gae wane, meve me kwimin danave dog aine sira God naniyutanwa apa wakene.

<sup>20</sup> ☆ Meve aigowawa dauwag amiya sira ampa ampa gae wag dirumiya. Ayapan mu gaibu nau ag gae meuma wat kinyatan oya irairawa toyau munne.

---

☆ **16:14:** 1Ko 15:5 ☆ **16:15:** Apa 1:8 ☆ **16:16:** Apa 2:38 ☆ **16:17:** Apa 2:4; 8:7 ☆ **16:18:** Ruk 10:19; Apa 28:3-6 ☆ **16:19:** Apa 1:9-11; 2:33-34 ☆ **16:20:** Apa 14:3; lbr 2:3-4

**GAE MATAIWA**  
**The New Testament in the Maiwa language of Papua New Guinea**  
**Nupela Testamen long tokples Maiwa long Niugini**

copyright © 2011 Wycliffe Bible Translators, Inc.

Language: Maiwa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 8 Sep 2021 from source files dated 28 Aug 2021

45dcb14f-9541-5013-8907-63bcfabcd6b5